

四庫全書

史部

欽定四庫全書

史部

貴州通志卷十九

二十九

詳校官監察御史

臣

徐如澍

刑部郎中

臣

許兆椿覆勘

總校官編修

臣

倉聖脉

校對官庶吉士

臣

潘庭筠

謄錄監生

臣

張德燾

欽定四庫全書

貴州通志卷十九

秩官

名宦

總部

周

莊

躋

史記作躋後漢書作豪仍從史記楚莊王苗裔楚威王使將兵從沅水伐夜郎至且

蘭採船於岸而步戰既滅夜郎定滇池欲歸報會秦奪楚巴黔中道不通留王滇

漢

唐蒙

番陽令建元中大行王恢擊東越使蒙風曉南越南越食蒙蒟醬問所從來曰道西

北牂牁牂牁江出番禺城下蒙歸問蜀賈人賈人曰獨蜀出蒟醬多持竊出市夜郎夜郎臨牂牁江江廣百餘步足以行船蒙乃上書曰南越王黃屋左纛地東西萬餘里名為外臣實一州主也今以長沙豫章往水道多絕難行竊聞夜郎所有精兵可得十餘萬浮船牂牁江出其不意以制越一奇也誠以漢之彊巴蜀之饒通夜郎道為置吏易甚上許之拜中郎將將千人食重萬餘人從巴蜀笮闕入遂見夜郎侯多同蒙厚賜喻以威德約為置吏使其子為令夜郎旁小邑皆貪漢繒帛以為漢道險終不能有乃聽蒙約還報以為犍為郡發巴蜀卒治道自犍道指牂牁江通西南夷數歲道不通上罷西夷獨置南夷夜郎兩縣一都尉夜郎通中國自蒙始

吳霸

元鼎間為牂牁太守請立夜郎後天子乃封其三子為侯諸夷懼服

陳立

字少遷臨邛人故金城司馬成帝河平中夜郎王興與鉤町王禹漏卧侯俞更舉兵

相攻牂牁太守請發兵誅之卒廼遣大中大夫蜀郡張匡持節解之興等不從杜欽因說大將軍王鳳謂宜乘時遣官誅之鳳乃薦陳立為牂牁太守立前為連然長不韋令蠻夷畏之及至牂牁諭告夜郎王興興不從命立請誅之未報廼從吏數十人出行縣至興國宜同亭召興興將數千人往至亭從邑君數十人入見立立數責因斷其頭邑君曰將軍誅亡狀為民除害願出曉士眾以興頭示之皆釋兵降鉤町王禹漏卧侯俞震恐入粟千斛及牛羊勞吏士立還歸郡興妻父翁指與興子邪務收餘兵迫脅旁二十二邑反立奏募諸夷與都尉長史分將攻翁指等翁指據險為壘立使奇兵

絕其饒道縱反間以誘其衆都尉萬年曰兵久不
決費不可供引兵獨進敗走趨立營立怒叱戲下
令格之都尉復還戰立引兵救之時天大旱立攻
絕其水道蠻夷共斬翁指持首出降立已平定西
夷徵詣京師

張亮則

字元修南鄭人牂牁太守威著南土永
昌越雋夷謀欲反畏亮則臨郡乃止

謝暹

牂牁郡功曹光武時公孫述據蜀暹乃與
郡大姓龍傅尹董氏保境為漢遣使從番

禺江奉貢光武嘉之
並加褒賞號為義郎

劉寵

字世信綿竹人牂牁太守初乘一馬之官
布衣疏食以儉化民居郡九年仍乘一馬

而還吏民
為之立銘

景

毅

靈帝熹平五年西南夷叛以毅為太守討平之多惠政為夷人所懷

諸葛亮

字孔明南陽人佐昭烈拜丞相後主即位封武鄉侯先是益州郡有大姓雍闓反建

興元年夏牂牁太守朱褒據郡反應雍闓三年亮征南中時牂牁太守濟濟火者聞亮至通道積糧以迎亮命為先鋒蠻帥孟獲擁衆拒命亮七擒七縱猶遣獲獲止不去曰公天威也南人不復反矣遂入滇池益州牂牁諸郡皆平

李

恢

字德昂建寧俞元人章武元年拜交州刺史隨丞相亮南征軍於昆明為蠻寇所圍

恢詭辭以待之寇圍稍懈恢出奇奮擊大破之追奔逐北南至盤江東接牂牁與亮聲勢相連平定南土恢功居多封漢興亭侯

馬

忠

字德信閬中人拜牂牁太守自朱褒亂後忠撫理甚有威惠及劉胄反以忠代張翼

為庠降都督遂斬胄平南夷加奮威將軍封彭鄉亭侯忠有度量忿怒不形於色恩威並立夷人畏

愛及卒流涕盡哀立廟祀之

張

嶷

字伯岐南充人從馬忠討劉胄戰每冠軍遂平南夷牂牁興古獠種復反忠令嶷討

之嶷招降二千餘人悉傳詣漢中遷越雋太守盪寇將軍賜爵關內侯

鄧

芝

字伯苗新野人漢司徒禹之後延熙十一年涪陵蠻殺都尉反芝以車騎將軍假節

率軍征討即梟渠帥百姓安堵

晉

李

毅

天水人廣漢主簿太康中罷寧州入益州

部太安二年復置寧州以毅
領刺史明達剛斷蠻民信服

王

遜

魏興人以廣漢太守代李毅為南夷校尉
寧州刺史時荒亂後官民虛竭綱紀弛廢

遜披荒糾厲收聚離散征伐諸夷俘馘千人計獲
馬及牛羊數萬餘於是莫不震服威行南土累加
散騎常侍安南將軍賜爵褒中縣公

毛

孟

寧州治中愍帝末西南夷叛會刺史李毅
卒孟詣京師求救不見省孟固請曰君亡

親喪幽閉窮城萬里訴哀不垂聽救既慚包胥無
哭秦之感又愧梁妻之崩城之驗存不若亡乞賜
臣死朝廷憐之乃
以王遜為刺史

董

霸

永嘉中以平樂太守破牂牁平夷等地

毛

楚

巴郡枳人牂牁太守為夷人所懷畏

唐

南承嗣

范陽人南霽雲子為娶川別駕賜緋魚袋歷施浩二州一云為清江郡太守多善政

時巡夜郎牂牁潯沛恩惠後自請從軍討王承宗柳宗元代為狀

高崇文

元和元年西川節度使領兵討平劉闢因定諸夷置蘭州

段文昌

字墨卿荊州人文宗時為四川節度使政尚寬靜間以威斷不常任也羣蠻震服長

慶二年黔中蠻叛觀察使崔元畧以聞文昌使人開曉蠻引還遷兵部尚書

冉安昌

招慰使昌以婺川當牂牁要路請置郡以撫之其後思夷等州土地之闢夷民之附

自斯
舉始

宋

劉光義

太祖乾德間平蜀光義以威德著請置永寧路以控羿羅諸夷邊鄙以寧光義爵里

無考姑
從舊志

宋景陽

真定人開寶八年廣右諸夷作亂詔景陽率師征之悉定廣右復進兵都雲等處西

南以平詔建總管於大萬谷樂等處授景陽寧遠軍節度使都總管以鎮之景陽撫綏勞來甚得遠人心而柳州慶遠民多歸附其蘇趙周高蘭蔡南容七姓舉族附焉卒贈太尉謚忠成子孫世爵其

土為宣
慰宋氏

李允則

字垂範濟州團練使謙溥子也太平興國七年擢閤門使高溪蠻田彥伊入寇遣詣

辰州與轉運使張素荆南劉昌言議
允則以蠻徼不足加兵悉招輯之

元

阿爾哈雅

輝和爾人至元二年僉河南行省事十五年降八番羅甸蠻以其總管文光兒

入見置宣慰司並八番羅甸等十二安撫司以鎮之
舊志載譚澄有平羅羅斯功乃四川建昌衛

地與黔無與宜刪又趙
世延之平烏蒙倣此

劉繼昌

至元時為兩淮招討司經歷行省阿爾哈雅遣招諭西南諸蠻繼昌深入險阻大播

德威八番兩江
溪洞皆降附焉

伊蘇德勒

納琳子智勇類其父至元十一年授西川蒙古軍馬六翼新附軍招討使遷四

川西道宣慰司加都元帥羅斯鬼國亦奚不薛叛詔以四川兵會雲南江南兵討之至會靈關亦奚不薛遣先鋒阿麻阿豆等將數萬衆迎敵伊蘇德勒馳入其軍挾阿麻阿豆出斬之亦奚不薛懼率所部五萬餘戶降以功拜西川等處行中書省左丞

烏魯斯

至元十六年置八番羅甸宣慰司首以烏魯斯為宣慰使時諸蠻叛服不常烏魯斯

討平之乃立安撫司以守焉

李德輝

字仲實通州潞縣人至元十七年西南蠻羅斯鬼國復叛詔雲南湖廣四川合兵三

萬討之兵且壓境德輝以左丞被命至播乃止三道兵勿進遣張季思諭鬼國趣降其長阿察熟德輝名曰是活合州李公邪其言可信即自至播州泣且告曰吾屬百萬人微公來死且不降今得所歸蔑有二矣德輝上聞乃改鬼國為順元路以其長為宣撫使其後有譖德輝受蠻馬千者帝曰是人朕所素知雖一羊不妄受寧有是邪不聽德輝受降還至黃平夜星竇如斗嘆曰他日嘗夢主鳥江今播水名烏江適遇是星竇吾死徵也吾嘗羨馬伏波老當益壯奇曹武忠為將不殺今所活者多馬羊裹尸歸何憾病七日卒贈中書右丞諡忠宣

張

禧

東安州人至元十七年從右丞劉深征八百媳婦國師次順元與叛蠻宋隆濟力戰

而歿贈左丞追封郡公諡武宣

碩格

蒙古人。世祖至元十九年，亦奚不薛叛，置順元等路軍民宣慰司，以碩格為宣慰使。

經理諸蠻二十四年，遷河東等路萬戶府，播州宣撫。賽音布哈等赴闕請留之，降八番金竹百餘砦。

得戶三萬四千，以其地為郡。縣置順元路金竹府，以統之。

李呼喇濟

隴西人。至元二十一年，以四川南道宣慰使與叅政奇爾濟蘇僉省巴拜左丞

汪惟政分兵進取五溪洞蠻。時思播以南蠻獠叛，服不常往。往劫掠邊民，詔並討之。一軍出黔中，一

軍出思播，一軍出澧州。呼喇濟一軍出夔門，會合伐山，通道破其險隘，敗其前鋒。諸蠻長乃降。

蒙古岱

契丹人。父保通，世祖時賜金符，襲父職。為隨路新軍總管，從行省伊蘇德勤征蜀。及

思播有功，陞萬戶。從攻羅必甸，破之。二十九年，入覲成宗，即位授烏撒宣慰使，遷大理金齒都元帥。

六年討平烏撒羅羅斯賜鈔銀鞍轡弓矢後遷雲南行省中書左丞宣慰使都元帥卒贈平章政事

封濮國公
謚威愍

劉國傑

女直人更姓劉貌魁梧善騎射初為湖廣行省平章政事大德五年宋隆濟及蛇節

反烏撒烏撒東川芒部諸蠻從之陷貴州詔國傑將各路兵討之賊銳甚官軍失利傑乃命軍士人持一盾著釘其上俟陣合即棄盾佯走賊果逐之馬遇盾皆仆國傑鼓譟趣之賊大潰斬蛇節隆濟去

李京

字景山河間人大德五年由樞密宣慰烏臺尋陞烏撒等道宣慰副使佩虎符兼管

萬戶時烏撒等地隸雲南行省京方下車會群蠻不靖按行調發饋給鎮撫周履滇境後悉其見聞

為誌略四卷以進翰林
學士虞集元明善序之

曹伯啟

字士開碭山人延祐元年拜刑部侍郎八
番帥擅殺啟邊釁朝廷用師伐之命伯啟

往詰其事次沅州道梗遣令使揚鵬單騎往諭
新帥脩得其情上奏坐前帥擅殺罪邊民以安

塔

海

蒙古人進士為嘉定路同知天厯中順元
永寧蠻梗化驛傳阻絕蜀省檄塔海往諭

之深入重險曉以禍福諸蠻遂幡然爭奉期約不
兩月驛騎雲集傳舍一新尋陞羅羅斯宣慰司同
知

克

楚

蒙古人至順初為八番順元宣慰使有惠
政勇畧過人嘗奉命將兵討雲南厥功懋

著

諾

海

蒙古人至順間為雲南行省都事彈忠勤
嫺辭令量出等倫烏蒙土官祿余叛諾海

奉詔往諭祿余拒不受俄而賊大至諾海因與力
戰比暮烏撒兵入順元境左丞特穆爾巴哈禦賊

諾海復就陣宣

詔招之遇害

諤勒哲

至明間任八番順元宣慰使都元
帥奉宣德意懷柔遠人境內康乂

明

總督

王

驥

東鹿人永樂丙戌進士正統六年以兵部
尚書提督軍務征麓川思仁封靖遠伯十

三年復征麓川還會貴州苗叛擒
其長蟲富檻送京師卒諡忠毅

侯璉

澤州人宣德丁未進士正統初以郎中叅尚書王驥軍務功成晉兵部侍郎鎮撫雲

南景泰初貴州苗叛攻圍普定平越諸衛勢甚猖獗詔命督軍進討璉至普定力戰賊大敗遯去平越諸圍俱解功進尚書又進克平莊堡長官司時暑雨方甚疫癘大作璉病薦猶戒諸將整兵進勦母貽生民患無一語及私舁歸普定卒

王來

慈谿人景泰元年辰沅靖及平越諸苗叛苗長韋同烈據清平香爐山為梗大肆劫掠

命來以都御史總督軍務及保定伯梁瑤帥師討之所至賊皆迎降遂進攻香爐山擒韋同烈等送京師餘黨悉平民為立平蠻恩信碑舊志有程信平都掌蠻屬四川非貴州地應刪

王軾

字用敬公安人天順甲申進士弘治四年以僉都御史巡撫貴州入為大理寺卿十

一年普定蠻婦米魯叛官軍往征營為賊劫殺布政使閻鉅執太監楊友死者甚衆十六年軾以戶部尚書督兵討平之加太子太保卒謚襄簡

張

岳

惠安人嘉靖二十六年總督湖貴初鎮草銅仁苗賊龍許保吳黑苗作亂總督萬鏜

討之首惡未獲遽班師至是復叛陷思州知府李允簡死之岳檄調總兵沈希儀叅將石邦憲督兵時邦憲被論當解任岳疏留之後屢破寇先獲許保母女妻妾後復擒保衆議班師岳謂吳黑苗竄匿必為後患復跡斬之事聞留岳鎮撫數年卒謚襄惠

馮

岳

慈谿人嘉靖三十三年以兵部左侍郎兼僉都御史總督湖貴時苗賊盧阿項煽亂

檄總兵石邦憲擊平之事聞進右都御史兼侍郎

李化龍

直隸長垣人進士經緯雄才久歷邊鎮總督川湖貴州主征播事其馭將機權取酋

方略出人意料雖羽檄交馳而尺牘文告皆珠璣錯落開誠布公得人死力賜劍未嘗輕用賊平功

遷尚書少保
播人祠祀之

王象乾

字霽宇山東新城人嘉靖時參議重光孫隆慶辛未進士萬厯辛丑以總督代李化

龍經理善後事繕城郭立學校撫流離置牧守簡將儲糧則壤定賦皆盡心為之播餘孽吳洪聚沙溪結連水西為亂設計討平之銅仁苗賊吳老喬平越賊阿浪等作亂遮滇黔道未半載悉平進右都御史父之垣官戶部左侍郎辛連章告歸瀕行疏水西安氏必叛天啟中果有安邦彥奢崇明之變後進少師兵部尚書卒贈太師

蔡復一

字元履同安人臨事果決下筆淵妙有文

武才天啟中撫治鄖陽尋拜少司馬總督
五省兵討水西一切兵食戰守早作夜
思心計手畫功未就以勞瘁卒於官

張鶴鳴

字鳳臯潁州人沉毅有膽識萬厯四十六
年巡撫貴州尋兼總督諸苗煽亂道路為

梗鶴鳴率兵勦之親履行間指
授方畧所至悉平蠻獠憚服

朱燮元

字恒嶽山陰人崇禎間總督蒞任後即有
桃紅壩之捷渠魁安邦彥等擒斬畧盡居

黔七載務在懷柔遠人創設各衛所城汎
布置有方畧晉少師卒於官以上總督

巡撫

王恂

字用誠公安人宣德庚戌進士正統時巡
撫貴州賑窮掩骼民夷懷畏景泰初遣祭

酒著有
誠齋集

蔣

琳

錢唐人恩廕景泰四年以副都御史巡撫貴州廉幹果毅剔蠹鋤強平清水江苗亂

遷建布政司署
為治卓有條理

白

圭

字宗玉南宮人正統壬戌進士凝重簡默喜怒不形天順初以副都御史巡撫湖廣

兼理貴州屢建征討績凡在行間不令家人子弟得冒功賞人以此多之歷官兵部尚書贈少傅謚恭敏

李

浩

字德廣安陸人天順時為左布政遣苗叛拜副都御史撫治四川大壩夷亂統雲貴

兵征勦所
向克捷

陳

宜

字公宜太和人正統壬戌進士成化初由雲南左布政遷副都御史巡撫貴州清淨

簡易推心置腹平都長蠻賜金幣已有訴功紀不實者意宜必徇庇宜乃具疏自劾且請究治事雖報罷輿論多其持正還兵部右侍郎

秦

敬

涿州人成化六年由浙江左布政陞副都御史巡撫貴州治責大指不苛細小民戀

之如慈母及代去黔民攜老扶幼送之百里涕泣不忍舍

宋

欽

字敬之陝西乾州人成化十三年以僉都御史巡撫貴州光明正大洞見表裏苗夷

感化相戒毋犯邊濶我公清寧之化陞南大理卿

陳

儼

字時莊廬陵人景泰甲戌進士成化十四年巡撫貴州興利剔弊惟恐不及西僎寨

苗弗馴躬往諭之歸化者半有終弗率者請於上躬探甲冑擣其巢號令嚴明信賞必罰於是憑崖伏洞者望風請降或持牛酒詣軍門羅拜捷聞賜勅褒嘉仲子杲從軍有功抑弗報將佐請遣之奏捷亦不聽官至南刑部侍郎

何喬新

字廷秀廣昌人進士歷官刑部侍郎成化間擢州宣慰楊輝寵庶子友欲奪嫡子愛

乃立友為凱里安寧宣撫司誣愛以交通唐王朝廷遣官即訊友賄諸權貴皆為游說喬新至盡條上其罪狀白愛無反謀而革友宣撫職播事遂定

孔鏞

字昭文山東人至聖裔天順甲戌進士成化時巡撫貴州有清平縣苗阿溪者桀驁

多智有養子曰阿刺膂力絕倫兩人相資橫行夷落歲賂上官以肆其毒鏞至廉得其狀用指揮王

通計擒而磔之一境以寧

鄧廷瓚

字宗器巴陵人景泰五年進士成化十年初設程番府舉瓚異等出守時方草昧瓚

以清淨治之蠻民悉奉約束城郭廨舍以次興作居程番九年四境晏如遷山東叅政弘治二年貴州黑苗叛勅廷瓚為巡撫提督軍務號令嚴明將校用命擒械首惡平之疏請更張為保境安民之計設都勻府獨山川麻哈州清平縣官至左都謚褒敏

張

廉

字孟介歸安人弘治間按察使陞布政使尋陞巡撫在事日久民俗蠻情靡不諳曉

凡所興革撫討悉中機宜

錢

錢

字大用杭州人成化二十三年為貴州按察使注意學校獎率人材製樂器以供祀

典增學舍以脩肄習立社學以訓蒙童弘治十二年由太僕寺卿遷副都御史巡撫貴州清操善政使時一如廉

劉

洪

字希範鍾祥人成化戊戌進士歷官雲南

史巡撫貴州值米魯叛剪其遺孽城其險要餘氛以靖上賜勅褒獎謂劉大夏曰劉洪會幹事蓋以大夏所薦也後遷任川廣有平賊功次子渠亦巡撫貴州有父風

洪

鍾

字宣之錢塘人進士弘治十八年以順天巡撫副都御史調貴州時值用兵後地方

疲憊鍾惟以休養安和為務尋奉命總制四川歷官刑部尚書左都御史

沈

林

字才美長洲人成化辛丑進士正德七年以右僉都御史巡撫貴州時宣慰宋然激

平西苗叛林疏請將貴筑平伐等七土司並洪邊十二馬頭地方金竹安撫二司總設為府洪邊貴筑各設縣並以流官撫理會遷去後撫陳天祥覆奏意見不同未即准行迨八十年後改設林言一券如左

陳天祥

字元吉吳江人正德八年以提調天津左

承寵糾卧龍賊王阿倫泗城州賊王彪等僭號為亂天祥與御史鄭約擒勦之召還協理院事

鄒文盛

字時鳴公安人弘治癸丑進士正德十一年巡撫貴州時清平衛苗阿傍等據香爐

山以叛焚劫興隆偏橋等處道為阻梗上命文盛合湖廣兵勦之破其寨俘阿傍等遂進勦黑苗擒

其魁阿茲捷聞降璽書獎諭歷官戶部尚書卒謚莊簡

曹

祥

字應麟歙縣人正德間巡撫先是鎮草銅仁等處苗亂祥至即諭以利害令解散其

不從者悉擒斬之普安蠻阿則及凱口苗阿向等糾黨煽亂祥集兵殄滅賜璽書慰勞及金幣有差

徐

問

字用中武進人弘治壬戌進士嘉靖間巡撫貴州為政以善俗化民為務都勻土賊

蒙越倡亂民疲轉輸問多方調停刻期勦捕越乃就擒著有請書劄記遺於黔官厯南戶部尚書謚

裕莊

劉士元

字伯儒彭縣人嘉靖十年以副都御史巡撫貴州先是正州鄭駱二土官漁獵剝民

有周天星王大魚等煽動作亂勦平之又流賊徐雲山等亂亦平之復疏免安撫司朝覲進馬地方

咸受其福

劉渠

字清甫巡撫劉洪次子正德辛巳進士嘉靖二十三年以右副都御史巡撫貴州以

烏撒道里綿遠苗賊强悍議建哨堡撥兵防禦請增設守備於迤東以兼制之詔從其議地方賴以

靖寧

王學益

字虞卿安福人嘉靖己丑進士二十四年巡撫貴州以弭盜之法莫切於保甲作保

甲諭其詞簡切詳明二十五
年題增解額歷官工部尚書

任

轍字子明安陸人嘉靖丙戌進士始為大理寺卿心存撫字尋以憂去民念之二十六

年巡撫貴州計縛叛苗吳龍等
遼陞以寧三十年以病乞休

劉大直

華陽人己未進士嘉靖間巡撫貴州光明俊偉具文武才立保甲法以止盜延工師

以教織清屯田練士卒省驛遞惠政甚多甫六月卒民罷市哭之

高

种

字允升安陸籍新淦人嘉靖丙戌進士三十五年由貴州布政陞巡撫會麻哈州土

同知宋珠煽賊王三等作亂种調總兵石邦憲集兵平之又都勻苗頭阿章等不納糧馬殺掠民人种檄兵脩項廷吉調土兵勦平之邦憲善用兵廷吉有執持种能專用之稱知人

吳維嶽

字峻伯孝豐人嘉靖四十二年巡撫貴州時苗賊既平言官謂撤沅州總督歸其柄

於貴州巡撫肯下所司議便於是吏賜璽書頒旗牌湖北川東大小諸司悉聽節制巡撫貴州提督軍務自維嶽始

鮑道明

字行之歙縣人戊戌進士嘉靖間巡撫時容山土司韓甸糾集諸洞以叛勢甚熾明

徵土兵遣將授以方畧擒斬
多功購縛向等還南廷尉

趙

錦

字元朴餘姚人嘉靖甲辰進士由南御史
巡按貴州因變陳言劾嚴嵩廷杖為民隆

慶改元巡撫貴州疏請改程番為貴陽府貴
筑平伐二司并為新貴縣歷官左都御史

杜

拯

字道濟豐城人嘉靖戊戌進士隆慶元年
以右副都御史巡撫貴州會同御史王時

舉疏請將湖廣沅靖二州及六衛四川三土司併
照條奏其便有十皆碩畫也當時泥不果行尋自
陳乞罷銓部楊博議留畧曰杜拯持一
廬而始終不變經三黜而耿介無雙

阮文中

字用和南昌人嘉靖癸丑進士隆慶四年
由太僕少卿陞右僉都御史巡撫貴州時

土官安國亨安智因事許殺前撫將坐以叛逆未
決前撫去文中代之閣臣高拱授以方畧文中至

默訪得其實復請於拱卒決其事免軍興之擾時
又有巨寇者念擁兵偕號垂三十年有司不能制
因不以聞文中復請計於拱發兵勸之
擒斬者念一境遂寧後移湖廣巡撫

許子良

字宜夫仁和人隆慶二年進士萬厯間巡撫貴州會雲南姚闕作亂子良日夜調度

斬級數百事得平尋
改鎮鄖陽未赴卒

嚴清

雲南後衛人嘉靖甲辰進士萬厯三年巡撫貴州清介自持不少貶疏請守巡分駐

地方卒為定制尤加意庠序增設廩
餼多惠政厯官吏部尚書卒謚恭肅

江東之

字長信歙縣人萬厯丁丑進士為御史正色立朝摘發內璫馮保姦狀侃侃有聲二

十四年巡撫貴州捐貲於各府州縣衛平價市買
備賑田右文田澤幽田恤隱局惠藥局田通馬穀

田欽恤軍田以賑助貧士資給軍民又於南明河中築鰲磯建甲秀樓以培風氣黔人稱賢撫者必以束之為首云

郭子章

字相奎號青螺泰和人隆慶辛未進士萬曆二十七年巡撫貴州歷十年習知民隱

凡所設施永垂利澤尤善獎拔士類經其品題率成名宿著黔記六十卷經濟卓然先是播州酋楊應龍作亂王師屢征不克天子拊髀廷臣交薦子章匹馬入黔增兵餉扼要害立賞格士氣百倍興師纔百餘日擒應龍誅之播州平始經理播州為平越等郡縣未幾復有皮林之役功與播等黔人戴恩建生祠七所更有建懷德祠以子章與諸葛武侯關大帝鼎足者三十五年陳情終養疏九上始得請晉兵部尚書

胡桂芳

字瑞芝金谿人進士寬和凝重喜怒不形萬厯間繼郭子章撫黔時軍興之後一以

休養生聚為事民用乂安

李

標

年鄧縣人巡撫貴州天啟元年予告候代次年二月水西叛圍省城標分布紳士兵民

協力固守一切糗糧火藥器械皆取辦於標時城中兵止三千倉糧萬餘石計可支一年四月總兵張彥芳率兵一萬八千入城坐糜倉粟標散八千於外既而糧垂竭每兵日食自一升減五合以至一合迨十一月顆粒俱盡乃集諸將士歆馬血以訂盟無二心者又踰月而圍始解晉兵部左侍郎

籍回

王三善

字彭伯永城人天啟二年以太常卿擢貴州巡撫甫拜命就道而黔已被圍三善號

召遠近兵來援六月次窺城河為賊所挫退保平
越至十二月復整旅前進賊敗遁圍解詔晉兵部
侍郎恚以討賊事付之三年冬率馬炯等三大帥
兵四萬自遵義入屢戰克捷直抵大方賊旁匿箐
洞相持久糧運不繼士有饑色乃旋師賊從間道
邀其歸路至內莊兵潰遇害事聞贈兵部尚書立
忠烈祠以祀之
以上巡撫

巡按

吳

訥

字敏德常熟人永樂末舉貢生宣德三年
巡按貴州綜覈精明百度振飭尤加意士

類著小學直解訓之比還藩臬以百金佐裝訥不
能却及去後寄還封識如故其廉而不激類此
官右副都御
史卒謚文恪

黃 鎬

字叔高閬縣人正統乙丑進士授御史按

嬰城固守凡九閱月士卒掘草根煮皮甲以食鎬
多方鼓勵身同甘苦援兵至鎬督兵夾擊賊乃遁

按貴三年條上黔事五十三疏言言中竊上嘉
納之歷官戶部尚書卒贈太子少保謚襄敏

郭 本

字道充融縣人景泰二年進士七年以御

疏劾之謫雲南永平典史久乃量
移自慨不得一抒才力辭疾歸

宋 有文

資縣人景泰甲戌進士天順間巡按激濁
揚清發奸摘伏不事鉤距翕然稱神明歷

官右副都御
史巡撫甘肅

楊

純 隣水人成化中進士十七年巡按貴州斷
決如流任滿百姓乞留一年朝廷許之民

謠曰隣水楊但願年年巡貴陽貪污畏法軍民安康陞陝西副使去之日民苗遮道攀留

鄧

庠

字宗周宜章人成化壬戌進士拜御史會貴州苗弗靖撫臣請加兵命庠往勸上言

宜從撫諭允之
歷官戶部尚書

王鑑之

會稽人成化丙戌進士十九年巡按貴州廉潔率下蠻夷信服時都勻仲蠻叛鑑之

單騎深入諭以朝廷德意蠻感泣投戈降獲免軍興之擾

包

裕

字好問臨桂人成化戊戌進士弘治元年巡按貴州寬洪仁恕耻以鷹擊驚擾為能

凡事務通民情不怒而威尤加惠
凡獨悉收之養濟院無失所者

黃

珪

字敬潤蒲圻人成化乙未進士由高安知縣陞御史弘治四年貴州都勻苗亂勅珪

往紀功改土歸流改衛為府厥功居多陞大理寺丞

王一言

字行之內江人進士弘治七年巡按端凝

霜雪寬嚴各以其時十二年陞雲南兵備尤多善政歷任僉都御史

馬炳然

字思進內江人成化辛丑進士由嘉魚知縣擢御史弘治間巡按貴州才名懋著歷

陞至總督為流賊劉六所執刃挾作書退軍不從遇害妻女俱赴水死事聞贈右都御史謚毅愍弟自然由進士為貴州右叅政剛毅不撓有炳然風

丁養浩

仁和人弘治九年巡按貴州擊強禦通下情興學育才以教化為先所至多吟咏

黃珂

字鳴玉遂寧人弘治間以御史按貴州卓然持大體不以博擊為能比用師討蠻亂

命珂紀功殲渠散脅凡殺良充級者悲斬以徇恩威並著卒以成功

張淳

合肥人弘治間巡按性嚴峻吏不敢犯監軍平普安米魯之亂厥功甚偉

徐文華

嘉定州人正德間巡按甫入境會有乖西阿賈阿禮之變相度機宜密授偏裨以奇

策討平之

周文光

字實夫金華人正德十年巡按時都勻苗寇充斥文光疏糾指揮潘繼武等退怯並

効叅政胡濂逗留之罪後賊平陞俸一級時四川巡撫馬昊勸雙蠻四散犇突合芒部烏撒等夷寇

點點兵發而川兵不至文光疏効昊玩寇趣其同力滅賊點人倚以為重

周廷用

字子賢華容人正德辛未進士巡按貴州值香爐山苗叛與巡撫鄒文威同心協力

平之其才氣倜儻豪岸言事不避權要
後為監司不肯逢迎阿諛以正直稱

胡

瓊

延平人正德十三年巡按威望丰采凜不可犯先是黔俗黷鬼巫覡以禍福惑人瓊

首厲禁之毀淫祠不在祀典者數百所一時民俗
丕變劾總兵昌佐之貪婪抑中官王誨之豪橫尤

凜凜
可稱

劉廷鑑

字器重安福人嘉靖二年巡按清苦自茹
按部屏除騶從匹馬雙旌偏歷荒徼發姦

摘伏凜
若神明

郭洪化

字子弼安福人嘉靖二年進士授御史十
年按貴州以諫採大木削籍為民卒後贈

光祿寺
少卿

王杏

奉化人嘉靖十三年巡按峻節凜然摘伏如神大猾斂手貴州鄉試原附雲南道里

艱阻杏奏請開科於本省從之

趙大佑

浙江太平人進士嘉靖二十年巡按果敢峭直執法不回臨大事決大疑片言而止

土酋有陰懷不軌者誓佑威名遂寢其謀歷官兵部尚書

薛繼茂

字隆華保山人御史倜儻有風裁屢著讜言萬歷中按黔懲貪剔蠹吏治為之一清

興學校廣解額黜士至今頌之

應朝卿

臨海人萬歷己丑進士官御史端亮敢言風采素著萬歷中巡按黔中殫力興除與

中丞江東之共置石文脩賑恤軍惠藥諸田士民利賴

楊

鶴

字修齡武陵人進士萬厯間御史立朝議

時獎羣心厭服巡按貴州以激揚自任暇則進諸生質疑問難夜分始罷諸生索書者滿前鶴欣然

一一揮灑宛若師弟子以此悅其教尋擢太常少卿厯官總督三邊都御史

史永安

字盤石武定州人以廢常授御史天啟元年出按黔次年水西叛將圖貴陽咸諷永

安當以巡行去不聽賊圍既合慷慨登陴與士民固守閱十月援兵不至城中食盡乃召諸將士誓死為作飲血歌以見志或有泣下者永安正色曰吾輩為朝廷守封疆經年城即破得死所矣正當談笑而道何泣為時援兵怯賊徘徊平新間永安復作四詩以蠟書達平越中有刺新撫逗遛語新撫見之親率諸軍即日進發一鼓破賊圍解晉太常少卿厯官兵部侍郎

傅宗龍

昆明人萬曆庚戌進士天啟間巡按時值王三善敗於內莊人心惶懼宗龍調兵籌

餉井井有條誅陳其愚之奸人心快服後厯官兵部尚書陝西總督討李自成兵敗死之謚忠壯

馮晉卿

合江人天啟壬戌進士崇禎十一年巡按振揚風紀無或枉撓豪猾斂跡尤以愛育

人才為念躬自課試第其等差而獎勸之多所成就蠲贖鍰修入川大道垂數百里行者便之肖象以祀著有天符笈草行世

朱奉鈞

字連水成都人崇禎辛未進士崇禎十五年巡按丰采峻整激濁揚清輦笑無苟杜

絕苞苴辨疑獄數十案一時號為神明復命歸里為流賊張獻忠所害以上巡按

布政使

蔣廷瓚

滑縣人洪武中舉才行有大度永樂初以行人討平思南叛苗七年遷工部右侍郎

後貴州設布政司上難其人以廷瓚素有威望於黔復為左布政使與民休息黔人頌之卒於官

陳

迪

字允道宣城人洪武中歷官雲南左布政使時普定曲靖烏撒烏蒙等苗亂迪率兵

擊破之獻俘於朝賜金幣官至禮部尚書建文中與齊黃同死難

易

節

萬載人永樂中進士宣德間為貴州左布政使寬洪有度撫字心勞一時治行翕然

稱長者民不忍欺焉

蕭

寬

吉水人永樂甲申進士累遷貴州左布政使寬洪有量端簡不譁未嘗疾言遽色而

處大事裕如也

范

理

字道濟天台人宣德庚戌進士歷官貴州左布政使或謂之曰公陟方岳南陽相公

力也蓋往謝理曰相公以我不事奔競故用我我往謝是辱相公知也楊聞之愈推重及楊歿理走數千里哭奠曰吾無以報相公惟此一掬淚耳歷官南工部侍郎

蕭

儼

內江人進士景泰間為左布政使多惠政奏請頒樂器增解額允之後致仕卒

彭

韶

字鳳儀莆田人天順丁丑進士成化中任廣東布政薦陳獻章十四年因劾採權諸

瑞忤上意調貴州甫下車首問民疾苦狀一切利弊即與興除民有訟即反覆勸諭如家人父子累

官刑部尚書謚惠安

王

詔

趙州人天順甲申進士成化時為貴州左布政使度量汪洪政尚愷悌羣吏化之民

用寧
謚

劉

元仁壽人天順進士授主事弘治四年遷左布政使廉靜寡欲以節儉為群僚先每飲

惟清菜一味人
號曰清菜劉

張

撫而實雞人弘治間布政使剛介明敏
而清苦尤著貪墨者瞿然化之

閻

鉦涇州人弘治十一年為右布政使米魯
之亂督餉遇害事平贈官廕一子入監

朱

芹富順人以右叅政分守平越天啟間安酋
叛圍平越芹歃血誓衆募兵堅守城乃得

全陞布
政使

朱家民

字覺民曲靖人天啟三年任貴陽守時黔
國初解閭里蕭條家民極力撫循漸有起

色尋擢安普監軍副使冒鋒鏑闢榛莽以通滇道
創建連雲等十一城扼要守險使賊不敢窺又盤
江湍悍舊以舟渡多漂溺家民欲建橋艱於架石
乃倣瀾滄江制冶鐵為鉅凡三十有六紐於鐵柱
而繫之兩岝布板楯其上凌空飛渡往來遂成坦
途夾岸遍布樓閣灑翠流丹輝煌掩映在黔十餘
年勞勩最多遷至左布政使歸
著有端俗約言 以上布政使

按察使

成務

興國州人洪武丙子鄉舉永樂初為御史
廉介有聲十一年設貴州按察使務為首

任秉憲得大體為
黔皋賢能之冠

杜

銘

金堂人正統乙丑進士成化初按察貴州
持心仁恕多所平反疑獄一訊即決亡蔓

引者愜官
刑部尚書

徐

珪

安岳人成化二十年按察使寬嚴調濟識
獄周詳必反覆無可出處而後入之民自

以不寃尋陞
左布政使

朱守孚

字仲孚桂陽人成化己丑進士
為刑部郎錄囚雲貴多所平反

陳

金

字汝礪應城人弘治九年按察貴州平易
果決尋遷雲南布政父老請留綸以識遺

愛金以所揮扇畀之衆寶藏焉時有遺
扇清風之咏倡和成帙歷官都御史

吳伯通

廣安人弘治十一年按察使不屑屑於細
務而大體詳明暇則進諸生講明經義纒

纒忘
倦

劉

丙

字文煥安福人成化辛未進士正德四年遷貴州按察使廉明詳慎以洗冤澤物為

已任決大獄每傳古義讀其牘者莫不縮頸吐舌駭為神明厯官南工部右侍郎謚恭襄

姚

鎔

字英之慈谿人弘治進士正德九年按察使作興士類頒矩矱定繩尺講業課士無

時有倦

韓士英

南充人進士嘉靖間芒部亂英以副使兵脩畢節築月城鑿池引城外水便汲又建

周泥站城衛民旋擢本省按察使

楊

最

字殿之射洪人嘉靖十五年按察使剛果敢為廉明執法人莫敢干以私厯官太僕

寺卿時有旨諭輔臣欲命東宮攝國一二年最疏諫云聖諭及此不過信方士為調攝計黃白之術

金丹之藥時可以斷喪元氣惟不過聲色保復元陽仙壽不求自至疏入大怒逮訊死獄中隆慶元年贈右副都御史謚忠節廕一子

胡堯時

字子中泰和人進士嘉靖中為貴州按察使嘗師事王守仁謂職任刑名宜先教化

以躬行為人士倡修陽明書院凡守仁著作在貴陽者悉刊行之

陳堯

字敬甫南通州人嘉靖乙未進士三十五年為貴州按察使治崇大體恤民隱會採

木命下堯持議不宜罷荒服有旨徵丹砂若干勛臺使者檄徵之堯持不下時有先輸者臺使詫堯曰夜郎丹砂赤如血佳哉堯曰此百姓血也安得不赤一座愕然所徵砂竟寢不報厯官刑部侍郎馮成能慈谿人嘉靖乙未進士隆慶三年為貴州按察使至則與郡人馬廷錫等講學建陽

明書院而為之記觀萬士和義倉慨然慕之於是
以粟易金益以已俸置田每秋成積貯貸還一如
萬之舊而田
遂為永利

程大賓

字汝見歙縣人萬厯元年按察使講明
理學尤多實踐言笑不苟僚屬憚之

楊寅秋

字義叔泰和人宰相士奇元孫由進士厯
遷按察使萬厯中討播之役寅秋監黔蜀

兵與中丞郭子章計用安氏以剪其羽翼乃檄安
疆臣率所部兵從沙溪入戰於大水田敗之四方
兵始合破其巢賊平論功寅秋為最以勞
卒於官子章為請卹立忠勲祠以祀之

蕭象烈

字無競廬陵人進士崇禎間官貴州按察
使清介自持平易近物凡所獻鞠務在原

情必嫉轉開釋而後已自奉甚約布衣蔬食有寒
士所不能堪者推天下清官第一會黔人情孽水

西目把事連起大獄象烈力為
平反忤直指意被劾落職去

張

燿

陝西人舉人崇禎末任按察流賊孫可望
陷省城燿同叅議曾益至定番與知州陳

新第約土司募士卒為恢復計未幾賊陷州城燿
猶操刀巷戰至日晡力盡被執賊將父能奇謂之
曰公我梓里也幸降我燿叱曰汝為賊我為朝
臣安論梓里罵不屈遂遇害
以上按察使

叅政

戴

金

字純夫漢陽人正德甲戌進士嘉靖七年
巡按四川十七年為貴州左叅政金按蜀

時值芒部之亂沙保等聚兵劫掠金奏調官軍擒
沙保復立隴勝為土官又疏稱芒部與烏撒烏蒙
水西等處因事讐殺乘機劫掠乃其常事而畢節
實諸夷出沒之所為川貴藩籬必武備修而後可

以消外患請令威清兵脩駐安莊仍於貴州添設
僉事一員分巡畢節烏蒙烏撒鎮雄東川赤水永
寧四府四衛一司更番操練以
脩諸夷貴州畢節設道自金始

洪邦光

同安人隆慶戊辰進士萬曆十一年以副
使兵脩都勻樂平司叛苗樂禮生挾土官

宋廷瓚夙仇糾衆反流毒甚慘邦光及知府梁柟
集兵勦之與指揮婁聯璧楊威定計擒禮生誅之
賊平陞
左參政

張悌

河南人進士倜儻有才慷慨自許夙以邊
才著名以四川叅政分守東川時討楊應

龍值總督李化龍丁外艱兵心稍懈獨冒暑單騎
走監諸營激勵將士竟以平賊遷大同巡撫卒

尹仲

字子求宜賓人天啟中舉遼才以叅政監
軍從撫軍王三善進討水西料敵制勝具

有成美內莊之役不用仲計以至敗仲護殘卒歸招集訓練危疆再安厯官河南左方伯明末獻賊破叙州仲家居被執不屈遂遇害

繆國維

字西垣吳縣人進士天啟初任右叅政分守新鎮道值安氏叛圍貴陽國維駐新添

聚兵固守扼其東下力持半壁諸郡賴以無虞厥功甚偉

朱之臣

字無易成都人進士崇禎初年以右叅政任貴寧道凡軍民利弊殫力興釐厯官戶

部侍郎文章政事為時所推重

李中行

山東人進士崇禎間以副使終養起貴州提學未至擢平安道叅政耿介不阿因黜

人憤擊水西目把事巡按撫琰受安賊賄誣以謀反殺胡朝棟等四人杖斃者八人中行憤極疏糾

琰為民訟冤語侵黥督朱變元有旨命黥督滇按勘其事奏覆奪其官黥民至今言及猶淚下

郭時亮

富順人舉人崇禎間為安平道叅政恬澹寡欲一介不苟蒞任三載一以清淨為治

士民安之會即岱生夷姦動時亮親往開誠撫諭遂寢其謀以上叅政

叅議

楊

廉

字念清泰州人洪武中用明經舉為御史宣德初擢貴州右叅議在熙六年清操一

節賜璽書褒之及卒無資歸里遂卜葬城東三坡林因家焉

尤安禮

字文度長洲人建文三年舉人宣德間由車駕郎遷貴州左叅議潔已愛民以疾乞

歸橐中僅餘俸八金歸即杜門以機杼謀生人罕知者有郡守秩滿入京適吏部與安禮同年詢其

起居不能答既還蘓遍訪之得安禮於委巷中方
自絡絲芒鞋敝袴意泊如也聞郡侯至避去不肯
見孫循舉於鄉曾孫越舉進士六世
孫錫類舉進士復為貴州右叅政

吳 裡 零陵人成化間叅議居官十年獨介廉明
始終如一歸里之日惟圖書數篋而已

吳 環 漳浦人弘治間叅議明
作有為積弊蠲除殆盡

蔡 潮 字巨源臨海人正德十一年叅議時苗賊
據香爐山叛出沒抄掠聲言奪清平城潮

計此衛不保全省之勢衝決矣遂留鎮撫告吏民
曰去與守等死耳守猶百全一吏民感悟願效死
乃修堞柵繕器械儲芻糧頃之賊突至圍城三匝
潮堅壁力拒間賊少惰出兵擾之急則入保士死
傷者親歷其門弔其孤嫠以故士益奮賊不得利
引去已去復來如是者二年而城卒不陷又踰年

鄒文威督兵進勦潮領左右二壘斬賊之功居多
清平人尸祝焉潮在貴凡八九年以讒不預政者
居半所至進諸生講明經史嘯咏自得厯官河南
右布政子雲程亦官貴州右叅政晉刑部尚書
楊儀射洪人進士嘉靖六年叅議時芒部苗普
斃數賊賊聚薪焚東門儀與宗祐及僉事龔亨計
將城門作隙製佛郎機擊賊連斃多人賊乃引退
城得全

劉望之

字商霖內江人進士以叅議分守銅仁性
嚴毅嘗謂擇地而官臨難而畏非丈夫也

一切行事惟役民便會鎮草銅仁苗亂總督
張岳征之望之有轉餉功厯官大理寺卿

王重光

山東新城人進士嘉靖間青州左叅議會
赤水蠻叛光親諭降部議超擢以採木留

光出入山箐冒瘴癘卒事聞賜祭贈太僕少卿
孫象乾萬厯間以兵部左侍郎總督川湖貴州

金從洋

華亭人隆慶辛未進士萬厯十一年以叅議分鎮銅仁時苗亂營壘未周卒伍未練

從洋至按地形規要害以松桃為川苗之吭扼而守之自寅至辰版築如堵賊不敢窺以百卒屯焉
時鎮官恣睢市井騷動白撫臣斥之民若更生在官二年志潔行廉外和中毅諸將吏感且畏之擢滇臬民遮道送有卧轍者

詹貞吉

巴縣人隆慶戊辰進士萬厯二十年以右叅議分守新鎮道值播逆楊應龍將叛人

情洵洵貞吉特攜家至平越以鎮人心衆方有固志貞吉居官澹泊簡易與民休息是時初設府凡經制籌畫殫厥心力蒞黔十餘年臨行宦橐蕭然惟圖書數篋

張文耀

沅陵人精神鋒穎以右叅議督餉轉輸不

縮之制皆其更定
善後之功居多

張棟

直隸人以叅議監軍入播洞曉兵機激發
將士破壘之日督戰陣前終日不食以勞

瘁病凱旋
出播而卒

向日升

湖廣人進士天啟間以右叅政兵備道駐
石阡之龍泉造士撫民輯兵禦苗多有惠

政民立
祠祀之

周鴻圖

字子固即墨人安邦彥叛以貴陽同知監
紀軍事積軍功至平遠知府六年監叅將

胡從儀及都司張雲鵬軍分道搜山所向摧破擢
叅議分守清鎮道是時鴻圖駐平越轄下六衛僉

事段伯圻駐安莊轄上六衛千餘里間奸宄屏息兩人力也

曾

益

鄱陽人貢生精書法好讀古名將傳崇禎末任叅議賊陷省城與張耀走保定番賊

攻定番益出戰斬首過當及城陷自題絕命詞末句云孤城魂莫散好去傍煤山投筆自經死以

上叅議

副使

李

睿

濟寧人監生宣德八年任貴州僉事正統二年遷副使先是諸郡衛強半無學睿疏

請遍建諸學教乃大行

鄧

玉

字廷璧江夏人進士天順間為貴州副使三十年廉介自持致政歸家足不履公署

湯全

字完之華亭人成化壬辰進士弘治二年副使渾厚精明寬於民而嚴於吏十八年

陞湖廣巡撫

吳倬

字克大淳安人進士成化十九年僉事旋擢副使倜儻有為外嚴內寬置學田以贍

士增站軍糧又為市田站軍思其德建祠祀之名曰表賢

陰子淑

字宗孟內江人成化壬辰進士弘治十年遷貴州副使兵倂都清嫺武畧善謀多智

人不可測黃土坡苗向阿讐叛談笑間擒而磔之諸部凜凜遷浙江按察使

席書

字文同遂寧人弘治庚戌進士正德四年副使提學貴州性嗜靜養學問根本周

程課士先德行後文藝時王守仁謫龍場驛丞書乃敦請入文明書院公餘則就見論學或至夜分

諸生環而觀聽者以數百自是貴人士始知有心性之學書後以議大禮稱旨加武英殿大學士贈太傅諡文襄

張庠

蓬溪人正德進士嘉靖十年以副使兵備都清饒智畧信賞必罰岩理苗亂庠徵兵

破之十一年豐寧土蠻楊桓叛庠復大破之去官之日士民卧轍攀留

馮裕

臨朐人進士嘉靖中出守石阡時播凱交惡裕討平之繼督芒部餉轉輸神速盤江

之役懋著奇伐久之遷副使罷歸蕭然道戶衣食不充處之裕如

林茂竹

莆田人正德丁丑進士嘉靖十二年兵倭副使芒部叛後曲計彌防民得安堵人思

之不

王

積

字子崇太倉人正德辛巳進士嘉靖十九年副使剛毅果敢法在必行庭無通事亦

無漏奸豪民猾吏與羣盜扞綱者按治不少貸以故良善獲安後歷官南兵部右侍郎

蔣

信

字卿實號道林武陵人嘉靖壬辰進士三十年以副使督學貴州訓生儒以默坐澄

心體認天理一時士俗翕然丕變雖喜怒不形第規規自度而潛移默化有出於勸督之外者所獎拔盡名士貴陽馬廷錫從之游粹然有成貴州有萬山中多虎患信為文驅之患稍息人比之昌黎驅鱷魚云被御史某誣劾削籍歸

徐

越

字子直貴溪人進士嘉靖二十三年以副使督學貴州講明心學陶鎔士類不屑屑

於課程嘗取苗民子弟衣冠之訓誨諄切假以色笑蓋信此理無古今無中外苟有以興起之無不

可化而入也。樾少師王守仁，謂聖人為必可為。歷官雲南布政會，滇夷那鑑叛，樾奮力勦之，遂殞於難。詔贈光祿少卿。

萬士和，字思節，宜興人。進士嘉靖間，提學副使。提督眾稍傲，朱晦翁社倉遺意，使貧士春貸秋還而為之記。

程嗣功，歙縣人。進士隆慶三年，副使。惇大廉明，務養和平之福。在任無赫赫名，去後人思之不已。

吳國倫，字明卿，興國州人。進士隆慶六年，提學副使。以詩名世，與王李諸人號七才子。課士以禮讓為先，風氣丕變。

凌

琯

歙縣人萬厯五年提學副使嚴氣正性世罕其倫凡教士即以文行忠信四字為言

學者奉為山斗每晨起必冠服禮先聖像乃出視事寒燠不輟厯官陝西按察使

沈思充

桐鄉人進士萬厯間任提學副使雅意作人留心文獻召紳士之有學識者會纂貴

州通志手自裁定犁然可觀

沈子來

字汝修歸安人萬厯庚辰進士三十八年以副使兵脩都清鯁直廉介不附權貴甫

下車值苗亂楊之以威撫之以德不數月平定議叙民苗敬畏以勞瘁卒於官

盧龍雲

廣東南海人進士萬厯三十八年以副使分守新鎮具經濟才平定苗亂民賴以安

張汝霖

字雨若山陰人官諭元忤子文章品行為時所推萬厯末年以副使提督學政範士

以嚴諸生無敢越繩尺者考較鑒別精當所拔皆知名士

岳具仰

延安人舉大官副使征水西從王三善死祀忠烈祠

鄭朝棟

澧州人由四川馬湖府陞畢節兵備道副使天啟間水西安邦彥之亂老弱死少壯

逃亡城池寺觀官舍民房盡皆焚毀棟多方綏靖崇禎初請發帑金一萬三千兩修築城垣招集流離民懷其德立祠祀之

洪聲遠

湖廣黃岡人舉人崇禎間分守新鎮道副使接物寬和民皆愛戴

陳士奇

字平人鎮海衛人天啟乙丑進士崇禎間為貴州副使提督學政博學強記下筆萬

言立就性孤嚴徑行一意士每進見必論文終日援據古今闡微抉秘畧無倦容脫粟之飯即與詩

生共之又善談兵思以戡除自見未幾以憂歸起補四川提學超遷巡撫值獻賊寇蜀奇已得代至渝城聞賊警遂與瑞王入守城破被執憤罵不屈賊嚮之時天正霽忽有震電之異以上副使

僉事

范循

南充人永樂初進士正統間擢貴州僉事性鯁介凜凜持三尺從事不少貸部署肅

然罔敢
軌法

何俊

字廷彥郴州人成化十七年督雲貴學政隨俗導化濟之以嚴凡所陶鑄俱中器使

陸健

字文順鄧縣人弘治進士正德間任貴州僉事西苗亂募黥者作行脚僧人寨募緣

暗帶苗境所無草實撒岐路為記又令軍中每人取拳石附膝間及春草種生時令去膝間石視草

生處直抵苗窟又置板屋插兩廂為庇以避礮礮苗驚為神駭擾因殲其魁苗境悉平遷福建副使卒囊無餘貲鄉人姚鏌治棺斂歸其喪

施昱

雲南人丙戌進士嘉靖二十年以僉事任兵備公明果斷遇事立決凡利民之事無

不興舉

田汝成

錢塘人進士嘉靖時僉事巡撫陳克宅復征凱口國賊阿向汝成獻書克宅陳說賊

勢深中窳要灑灑數百言大旨以據其要害斷其糧餉重營密柵勤其間覘勿以角利為言又請褫革容奸之土司王仲武以仲國法克宅閱書不省卒致敗

龍遂

字良卿永新人嘉靖乙未進士為給事中忤嚴嵩謫三十年稍遷貴州僉事飭兵思

南思南人聞其名皆畏之遂至任以德化民
生致治首吳黑於理事開賜金帛後以誣歸

黃

鎮

鎮海衛人嘉靖丙辰進士萬厯中以僉事
駐畢節築石隄三百丈以障河泛又捐置

學田士
民頌之

胡

宥

字子仁休寧人進士萬厯九年由御史以
僉事兵脩畢節蒞官清慎改學刊書修城

練兵均賦賑乏惠澤無窮病卒於官有僕文訓文
學者文訓曾刲股雜粥進宥文學憫其主孤魂萬
里欲從死自剄其喉咽創不合者
僅指許而竟不死時稱二義僕云

胡

琳

字璞完會稽人萬厯三十一年為督學僉
事才品卓犖精於藻鑑毫髮不爽初試黜

東諸郡還撫軍郭子章問曰此行已得元否曰銅
仁饒生楷者可元也已而省試畢入見復曰元當

屬貴陽潘生潤民矣比撤棘潘果元而饒亦登上第其以首名得售者十八人餘皆前列無遺錄者

官至太常少卿

劉錫鉉

長洲人天啟初以僉事督學黔中校士甫竣尋值圍城之變錫鉉攝監軍事督諸生

日夜巡守脩極勞瘁至於調劑兵食相度機宜深謀遠畧非他人所及危城得全錫鉉功居多圍解晉秩副使因與直指齟齬遂被劾歸

段伯炘

雲南晉寧人由鄉舉為鎮寧知州力拒安邦彥擢僉事分巡鎮寧邦彥寇普定偕叅

將胡從儀擊破之由此擢叅議事詳周鴻圖傳

李若楠

廣西人以推官駐鎮新添天啟間安賊亂守禦有方賊不敢近陞畢節僉事以勞卒

官於

詹時雨

字敬五鄱陽人甲戌進士由蕪松叅政左遷貴州督學道僉事以忤權貴故也在任

執法不阿雖當道無敢干者所錄士皆真才先後售去遷河南叅政道阻不能前點撫疏留之遷貴

州按察使以上僉事

傅友德

字惟學宿州人洪武初封潁川侯充征南大將軍率師趨貴州攻普定擒安鎖築城

通道屯兵聚糧恩威並著烏蒙烏撒東川諸蠻相率降附邊地悉平進封潁國公

吳良

定遠人洪武五年古州八萬諸洞苗亂良以江陰侯充總兵官佩征南副將軍印率

師討之次零溪進攻銅鼓五開潭溪克之既而擣龍里通洪州開太平所向皆捷獨清洞巖山苗掾

險久不下良以計襲破之殲其衆古州八萬皆降
收撫洞苗二百餘所籍其民以其地隸思州宣慰
司卒贈江國公謚襄烈

顧

成

字景昭湘潭人後家江都容貌魁梧勇壯
有膽畧洪武九年從傅友德平蜀破貴州

蠻克普定授普定衛都指揮同知已而征雲南有
功進征南將軍鎮貴州建文初班師四年以左都
督封鎮遠侯又出鎮貴州申嚴號令威惠並行搗
臺羅寨斬叛酋普亮群蠻震懾卒年八十五贈夏
國公謚武毅
民立祠祀之

吳

復

字伯啟合肥人封安陸侯徙潁川侯征雲
南克普定已西堡阿得寨蠻反復令顧成

率兵討平之後轉餉
盤江卒追封黔國公

仇成

含山人洪武十二年以安慶侯充征南副將軍征美容諸洞復從征雲南克普定普

安皆
有功

沐

英

定遠人洪武初累功封西平侯十四年充征南將軍副傅友德討梁王及貴州東川

諸蠻悉平卒贈
黔寧王謚昭清

費聚

濠人洪武十四年從傅友德征雲南克普定明年置貴州都司聚署司事雲南平封

平涼侯
藍玉係逆臣宜刪
舊志有

梅思祖

夏邑人洪武三年封汝南侯十五年署貴州都指揮使宣布德威民蠻安之

湯

和

鳳陽人洪武十八年銅鼓蠻吳倫兒倡亂上命楚王討之以和充總兵官佩征南將

軍印江夏侯周德興都督同知湯禮充副將軍偕往師號二十萬擄其巢穴執吳奮兒及其子送京師

葉

昇

命合肥人洪武十二年封靖寧侯二十年冬

處蠻寇明年昇兵至普定克陸肇白照水冒等洞七月進勦東川烏路等寨平之

陳

桓

由濠人洪武初同胡海郭英率兵征雲南桓由永寧趨烏撒克七星關而進滇平功封

普定侯二十一年奉詔通畢節道桓刊除榛莽分布屯田為久遠計畢節遂為重鎮

俞通淵

巢人父廷玉兄通海淵以父兄故充叅侍舍人功陞都督洪武二十四年古州蠻反

命淵統諸軍討之克銀賴諸洞俘斬無算封越雋侯

馬

驍

洪武初為貴州都指揮使政令明肅人莫敢犯創建城垣躬自督率聖厚處固至今

屹然肇造之功驍為第一後坐事死時論惜之

陸

秉

鳳陽人洪武中以寧國衛指揮留守安莊衛武畧政事冠絕一時墾闢屯田九萬餘

畝遷貴州都指揮尋調入京卒

鄭彥文

山西蔚州人仕元為萬戶入蜀因家焉明兵平蜀率土官首先歸附授貴州宣慰招

集民夷卓有善政從征雲南陞工部右侍郎

張翼

臨淮人洪武時以都督僉事從征雲南克普定曲靖取鴈慶封鴈慶侯舊志載曹

震有開永灘功今不屬黔應剛

程 暹

使洪武初自滄州衛指揮還貴州都指揮

楊 文

舍山人洪武時左都督三十年古州蠻林小斯以妖術倡亂命楚王楨帥師湘王柏

副之以文充總兵官佩征蠻前將軍印簡徒三十萬由沅州伐山開路二百餘里直抵洪州泊里永

從諸洞寨分道夾攻大破之擒賊二萬餘人

韓 觀

成子也古州蠻林小斯倡亂命觀以副總兵副楊文討之勦平臻部六洞蟒蠻天柱

天堂大小坪諸寇

何 福

鳳陽人洪武二十二年以總兵官平都勻蠻俘斬萬計三十年討平畢節水西諸蠻

邊境大定後封寧遠侯

南

黨

郡人永樂初為征蠻總兵領兵征苗至十萬穀力戰死尸猶立不仆王辭苗見而神

之載尸歸
葬為立廟

蕭

授

木詳其籍貫永樂二十一年治古峇異部落叛以右都督充總兵官帥師平之宣德

二年平都勻苗賊傳榜六年治古峇異復叛再奉命征討馘其長吳阿遮龍峇那等以其地附平頭司隸銅仁府
邊境以寧

常

智

興隆衛人宣德間官都指揮桓毅勇果修學宮繕城壘厥績最著

洛

宣

貴州衛人官都指揮洪武十六年從沐英往滇後征麓川身先士卒力戰死事聞賜

祭加其子
官二級

王

輅

前衛人官都指揮從征麓川陣亡事聞賜祭

顧

勇

成子饒智勇任都指揮僉事守普定兵民畏服尋從征麓川戰死

孫

禮

新添人正統間都指揮勤於政理創建學校

吳

亮

滁州人正統元年以都督同知充副總兵官鎮貴州號令嚴明士卒用命寇盜屏跡

張

祥

四川行都司指揮僉事正統己巳貴州苗叛祥率所部來救至赤水大捷駐兵守之

會霖雨賊來攻勢甚盛祥曰事急矣吾屬當為國死至清水鋪力戰死衛人立祠祀之墓在赤水

郭

英

籍貫未詳正統間以叅將鎮平越威惠無行壘皆懷畏軍務旁午不廢詩書時稱為

將儒

方瑛

全椒人咸遠伯政子正統七年從侯璉征貴州進右都督移駐貴陽景泰元年以征

香爐山功
封南和伯

權繼武

興隆衛指揮厯官都指揮正統間
螃蟹苗叛繼武進征香爐山戰死

李震

南陽人正統中征香爐山有功進都督僉
事天順四年絞洞苗叛攻龍里城詔湖廣

巡撫王儉及震為總兵官討之震乃分兵
攻絞洞諸寨追獲其魁李天保餘黨悉平

張任

貴州衛指揮驍勇多材畧嘗持鎗刺虎衆
號莽張正統六年陞貴州都司景泰三年

征香爐山又撫平西等一百七十三寨陞叅將天
順元年陞都督僉事充平蠻將軍卒賜祭遣進士

鍾震
造墳

劉 翀 威清衛百戶勇畧超羣正統間從征麓川奮不顧身親冒矢石出入敵陣斬獲渠魁

累官指揮僉事

張 貴 威清指揮有膽畧征討多勲庸正統間苗寇圍城貴與指揮賈鏞分率精銳出其不

意敗之賊遂潰去陞都指揮

金 桂 廬州人正統間任平壩衛指揮正大剛果軍政修明功陞都指揮僉事

毛 勝 京師人景泰間充副總兵率兵征香爐山苗韋同烈功封南寧伯卒贈侯謚忠壯

梁 瑤 汝陽人保定伯銘子景泰間充平蠻將軍征香爐山苗有功進封侯舊志作石瑤訛

陳 友 全椒人景泰間征香爐山功遷右都督平蠻將軍鎮守湖廣天順元年捕五開銅鼓

苗賊召還封武
平伯進封侯

何

瑛

凡河南人景泰間任平壩衛指揮廉慎公勤

揮僉
事

李貴

順天人智勇超羣景泰間以副總兵鎮守
值苗叛多方撫勦乃戢建譙樓置壺漏葺

祠宇多
所創建

王

通

新添人官都督鎮守清浪都勻闢土地
置郡縣武功茂著引年勇退士論高之

彭

倫

永定衛指揮成化中充叅將鎮守清浪凡
三十年屢平茅坪蛟洞古州印水諸賊而

天柱白崖塘之功尤奇遷
都督僉事移鎮貴陽致仕

張

晟

功威清指揮讀書尚氣節長於詩以征南

陸

卿

安莊衛人雲南都指揮僉事卓有政聲繼守臨安

遷都指
揮同知

王

聚

清平衛千戶剛方果毅遷都指

屠

昇

都勻衛指揮使讀書有武畧成化

王

謙

赤水衛指揮成化間諸苗蠢起衛卒赴調

不敢逼卒保無虞後水西及祿肇爭地讐殺謙入夷壘理解之因為分疆乃各散去會西苗普苗叛命將勦之謙督水西夷兵往襲其巢功遷都指揮使

丁

實

都勻衛指揮使遷都指揮同知成化間征仲賊死於敵事聞以孫暉為都指揮僉事

史

韜

新添衛指揮征陳蒙爛土有功弘治間遷都指揮調征普安盤江沒於陣

郭

貴

普安衛指揮同知機敏有能守備普定功連都督充叅將鎮守貴州迤西桴鼓不驚

卒於鎮

施

瓚

通州人正德初以世伯總兵貴州軍政修舉苗蠻畏服雅好文學命工繪七十二侯

圖王守仁為之序

黃

鏞

都勻人正德間官都指揮號令嚴明

何

卿

成都人正德十四年芒部苗叛攻永寧衛嘉靖元年卿以叅將鎮其地四年討平之

陞四川副總兵六年芒部復叛仍命卿來征八年
平卿在鎮禮賢事老澤及枯骨民為立碑太史楊
慎作雪關謠曰雪山關寒風起十二月斷行旅霧
為菁冰為臺馬毛縮烏聲哀將軍不再來西路何
時開蓋述途人之
思卿也歷官都督

王

璽

龍里指揮嘉靖間官都指
揮忠直剛勇賢聲丕著

楊

仁

字天爵貴州衛指揮嘉靖元年為清浪叅
將屢立戰功歷擒剿賊已請告巡撫劉士

元巡按郭洪化交薦起之陞總兵都督叅將攻凱
口賊走之捷聞陞一級賞銀幣仁雖出行伍精文
墨所著有瓊
山詩稿一卷

沈希儀

字良佐臨淮人嘉靖中為
貴州總兵平鎮銅諸苗

石邦憲

字希尹清平衛人資貌英異兒時苗迫城

賊不足多也識者壯之比長襲衛指揮守脩都清
會思石苗叛據江村國邦憲設奇破之又磨于崖
苗叛據險為亂憲率兵徑至崖下圍之乃招集三
軍樹旗百步外曰我射中旗竿賊當平一發果中
軍中踴躍乘風舉火斬關而登擒斬無算擢叅將
二十九年銅仁剽賊龍許保等據麓龍山攻銅仁
思州陷石阡全省震恐上命總督張岳開府沅州
勦賊憲入見曰興師十萬日費千金不若用賊攻
賊以一日費撫其順者為心腹以一日費賞其順
者以誅叛不一年而賊可平也賊逼銅之南岸憲
率兵往援諸苗驚曰石老虎來也賊遂遁憲追至
龍塘大破之斬馘無餘賊勢日蹙於是捐厚貲招
吳來格等散其黨許保就擒剽賊盡滅邦憲力也
遷都督府僉事鎮貴州進右都督崇祿大夫屢蒙

欽賞廕二子隆慶二年卒賜祭葬

胡璋貴州衛人嘉靖時守脩普定苗寇亂璋防禦有方士民不擾官都指揮二十餘年仁

愛忠勇軍士畏懷官至滇西叅將

邱潤新添人都指揮僉事剛直廉明文武兼瞻修學除盜卓有聲稱

何自然新添人官都指揮僉事長於詩有儒將風功遭楊州叅將所至亦多異政

安大朝衛千戶性沉毅膂力過人有開疆績官至都督同知

梁東旭安南人以諸生襲祖職為衛指揮厯官副總兵敎詩說禮雅有儒將風撫士卒以恩

人樂為用故能成戰功

郭成

叙瀘衛人萬厯間總兵於銅仁遇苗出劫
密遣人入其穴斬賊出賊猶不覺皆以為

神移營要害絕苗往來每挺身出入林箐中即部
隊亦莫知其踪跡苗一日三四驚曰郭公來矣相
戒莫敢犯時城中兵少僅家丁百
餘人成厚餉之遂能轉弱為強

劉綎

綎南昌人播酋倡亂綎以都督率兵進攻時
楊應龍忌綎威名欲挫其鋒悉簡精銳付

子朝棟以與綎戰綎大破之賊為奪氣後
破數關遂抵因下征播之役綎功為最

吳廣

廣東人平播之役以都督率兵進征綎攻
其前廣破其後兩人同心協力賊平綎功

為最廣
次之

馬孔英

宣府塞外降丁也積功至總兵官征播之
役孔英所將違卒及諸土兵皆獷悍破桑

木九杵黑水諸關獨先入道至海龍國下諸將以
國後易攻爭走其後孔英獨壁其前錄功進都督
同知世
廕千戶

陳

璘

字朝爵廣東翁源人以湖廣總兵官討楊
應龍從偏橋入盡滅江外四牌江內七牌

之賊破青蛇險國克大小三渡關抵海龍國下後
又勦平水砦山及東路苗以平播功加左都督世
廕指揮使卒後又以平苗
功贈太子太保再廕百戶

李應祥

湖廣九谿衛人代童元鎮為貴州總兵官
討楊應龍由興隆入破黃灘關直抵海龍

國與諸道兵共滅播明年改鎮四川播遣賊吳洪
盧文秀等惡有司法嚴而遵義知縣蕭鳴世失衆
心洪等遂稱應龍有子聚衆為亂應祥偕副使傅
光宅捕之盡獲尋卒以平播功贈左都督世襲千

戶

胡從儀

字漢長山西人天啟三年以偏將鎮下衛信賞必罰用兵如神先是萬厯末仲賊嘯

聚劫掠官道自鎮遠以上商旅不行屢勸之不得其要領安賊亂後益猖獗從儀蒞鎮微服假貿易遍厯諸夷落得其山川險易出沒途徑及諸獠馴桀之狀乃畫地分汛以守之設高峯立斥堠三里一樓柝聲相聞日夜不絕每有竊發傳礮為號諸路兵立集追擊賊無得逸者從儀日往來巡警居無定署出無定向時而肩輿尊從時而單騎獨往時而徒步潛行人莫知其所在以故諸汛防卒無敢少懈七八年間道不拾遺游陞都督僉事朝廷聞其名召還比以久瘴鄉疾剝卒於京邸行人為立真將軍碑以志之去後餘威猶在又逾年賊始稍稍出劫漸不能制道梗如初

馬

炯

蔚州人官總兵天啟三年征水西從巡撫王三善戰死祀忠烈祠

秦民屏

石柱土司官副總兵從巡撫王三善討安邦彥戰最力三年正月從總兵張彥方渡

鴨池河搗邦彥巢破賊五大寨四年正月內莊之敗戰死

黃如龍

鎮遠縣人萬厯間平播州靖黎九股勻哈夷壩諸苗累功叅將天啟二年從征水西

內莊戰歿事聞贈都督僉事祀忠烈祠

張彥方

籍貫未詳天啟初總兵有勇畧輯軍殲苗民間不擾立祠祀之

魯

欽

長清人天啟二年貴州總兵張彥方在圍中總理杜文煥稱疾欽以保定總兵代文

煥總川貴湖廣漢土軍刻期解圍未至圍已解欽馳赴貴陽率諸將擒勦土酋何中尉宋萬化又敗

安邦彥於汪家冲解普定之圍六年三月邦彥大舉入寇欽禦之河上連戰數日夜半賊直逼欽壘將士逃竄欽遂自刎欽勇敢善戰為東南諸將之冠後贈少保左都督世廕指揮僉事賜祭建祠曰旌忠

王達遵義人貢生授浙江湖州府判值安奢二酋叛達請從事戎行改官貴州都司恢復遵義進勦水西同黔撫王三善殉難大方事聞賜卹附祀忠烈廟

劉岳貴州衛人武進士以叅將鎮新添衛威服羣蠻

侯梁柱郡人天啟四年以邊功授叅將後平奢安亂陞總兵崇禎間奉詔勤王至萬里箐遇

賊死之廕子錦衣指揮

許成名

字賓實貴陽人以弟子員襲指揮使勦毛口六墜賊平之擢安南遊擊疏通滇黔大

道陞赤畢總兵官平桃紅壩大捷斬安邦彥莫德獻俘京師尋改鎮全楚勦寇有戰功予告歸年七

十三卒

龔應龍

綏陽縣人崇禎時參將謀勇邁衆黑苗叛圍興隆應龍督兵解圍有全城功人尸祝

之

劉鎮藩

烏撒人以諸生累官總鎮獻賊入川戰敗投江死

國朝

羅託

宗室鑲藍旗都統順治十五年以寧南靖寇大將軍督師取黔甯至境賊望風遁四

月入貴陽軍令嚴肅秋毫無擾七月賊遣兵襲黔
一夕奄至城下令士卒開門以待賊引去又分兵
寇青岩敗走之自是膽落不敢復
窺黔既而王師進滇遂定西南

趙廷臣

字君鄰鐵嶺人順治十五年夏四月王
師定黔秋九月廷臣奉命巡撫下車日

延見父老博採旁咨盡得民疾苦狀凡所條禁措
置患洞幽隱定賦額請蠲賑興學校禁貪橫嚴驗
擾種種實政殘黎獲甦晉雲貴總督屢平叛亂功
在邊陲康熙元年調浙閩總督去之日士民擁道
攀號者萬人又逾年以勞
卒於官訃至無不泣下者

洪承疇

字亨九漢軍原籍福建南安人前明萬曆
丙辰進士順治十六年滇黔未定以大學

士為七省經畧夏四月至貴陽時賊甫遁民居灰
燼倉無粒粟承疇多方招徠捐金散給以修屋舍

勸令預輸以給兵食禁士卒不得出城野無牧馬民免騷擾平滇後還朝卒贈少師謚文毅

蔡毓榮

漢軍正白旗人湖廣總督康熙十九年授綏遠將軍同諸軍恢復雲貴賊平後改授

雲貴總督時逆氛初靖流離載逆毓榮招撫散亡給牛種勸耕作創定規制條列利病安反側籌兵

食諸大政見之施行滇黔賴之

甘文焜

遼東人康熙八年任雲貴總督寬嚴得宜吏畏民懷時吳三桂在滇歲糜軍餉數百

萬役重民困焜悉與蠲免奏增驛遞夫價以給歲運會內艱請假葬親還京召對面陳三桂不軌

狀十二年五月回任十二月三桂反提督李本深以安順應焜知省城不可守殺其妾攜子國臣馳赴鎮遠思招集楚兵阨險隘使賊不得北出時副將姜義先已從賊各營響應文焜知事不可為赴

吉祥寺先縊其子北面再拜痛哭自刎筆帖式
何善雅圖皆死之事 聞贈兵部尚書謚忠果

范承勲

字蘓公漢軍正黃旗人康熙二十五年任
雲貴總督時當吳逆定後未久滇黔規模

草創承勲輯盜安民整飭營伍建
學校置經籍在任六載利賴實多

田雯

字綸霞號山薑德州人康熙甲辰進士二
十七年巡撫貴州茹藥飲冰端躬率屬以

去弊樹利為己任在任四年勵官方嚴武備撫戢
苗蠻咸惠並行捐俸積穀脩荒尤加意學校愛民
養士惟恐不及時人比之郭子章遷刑
部侍郎官民思之不置著有黔書行世

衛紹芳

字猶歲號復菴猗氏人順治丙戌進士康
熙元年督貴州學政手自校文旁無假借

崇雅黜浮以薛瑄王守仁語錄訓士闡明理學教
子弟必以小學為先士之貧者捐俸賑之舉行鄉

飲教民養老風化為之一振去之
日士子感德追送二百餘里乃返

王之鼎

字公定遼東人康熙十九年以定海將軍充四川提督恢復全蜀時逆賊吳世璠猶

踞貴陽復犯永寧六月提兵往援賊以九偽將軍之衆圍之數匝三閱月糧盡援絕猶聞率兵挑戰士氣益勵至九月九日賊以火藥轟城城陷被執拔刀自刎未殊昇至貴陽賊黨夏國相等百方勸脅罵詈不屈遂於九月二十九日延頸就戮於北門之川主廟前同時被害部下總兵何成德等十二員是日黃塵蔽天大風拔木事聞賜諡忠毅贈少保卹廕有加郡中士民籲建專祠於南關之

御書

馬棚街

忠節垂芳匾額以旌之

同時殉節十二人

何成德

陝西人隨
征總兵

王永世

榆林人隨
征總兵

劉奎

陝西人隨
征總兵

傅汝友

籍貫未詳
隨征總兵

楊三虎

福建人永
寧協副將

傅富

山西人隨
征總兵

劉應科

西華人四川
督標左營遊擊

陳田

大名人四川
督標右營遊擊

陳先鳳

正紅旗人陝
西提標左營遊擊

地藏保

滿洲人陝
西提標右營遊擊

潘濟世

旗人
廕生

陳應科

山東人隨
征立功

蘓大有

襄陽人性忠
勇膽畧過人
雍正五年以
定廣協副將
征討八寨丹
江清江古州
等處

每身先士卒
以忠義鼓舞
衆所至奏功
清江之役攻
黃茅嶺苗伏
莽中刺傷左
腿血透衣履
猶揮刃殺

賊左右驚問謂苗血濺吾衣耳又大勝回營方解
衣示衆曰項實負創言之恐亂軍心大丈夫為
朝廷出力死且不撓此何恤焉軍士聞之愈激苗人
畏其威名目為蘇大刀每臨陣見其旗幟輒奔潰

以功還古州鎮總兵卒於官奉
旨祀賢良祠

貴州通志卷十九

欽定四庫全書

貴州通志卷二十

秩官

名宦分部

貴陽府

元

張懷德

東安人大德間為知州值土官宋隆濟及蛇節反攻貴州時承平久兵備廢弛衆心

洶洶懷德募義勇合官軍殊死戰衆寡不敵被執賊欲降之懷德大罵不屈而死郡人表其戰地曰

崇節

宋阿重

景陽之後為貴筑長官以叔宋隆濟結諸夷為亂棄家朝京師陳其事宜大德中為

順元同知宣慰使後加平章政事柱國順元侯克服叛逆威著南裔卒追封貴國公諡忠宣

伊喇薩納

蒙古人至大間為萬戶非西帶蠻阿滿等入寇遣薩納調思播土兵并力討捕

聽其便宜行事已而寇平

何成祿

皇慶中為順元路儒學教授富文學飭容止訓迪誠懇郡中人才勃興又嘗遷建學

舍而以故址朔書院

馮士啟

字夢弼許昌人為八番宣慰使令使裨贊帷幄多著良謨後官至禮部尚書

范

滙

至正間為順元宣慰司副使文學政事聞於當時郡中紀載多其手翰

廖志賢

至正間為宣慰司學教授啟迪多方遠邇嚮風一時稱其善教

明

宋欽

阿重孫舊名蒙古岱元時以平寇保境功授昭勇將軍八番順元等處宣慰使都元

帥加鎮國大將軍兼四川等處行中書省叅知政事洪武初同竊翠歸附賜名欽授懷遠將軍世襲

宣慰使

汪藻

內江人幼稱奇童成化間登進士為兵科給事中首劾王直王越開邊釁立西

廠章上乃罷廠出藻為程番知府夷民畏服嘗拓郡城遷府治皆不煩民力定都勻兵變藻與

有功焉

何 庠

新城人正德間知程番府
弭盜安民人至今思之

汪 仲 成

績溪人嘉靖間知程番府
絕苞苴修城池立保甲士民德之

龍 翔 霄

字潛之武陵人嘉靖間知程番府以禮讓
化俗歸泗城州流移之民正金石司擅殺
之罪德威茂著尤肯急人之難鎮遠守袁成龍道
卒翔霄經紀其喪送還鄉思恩吏目高守仁罷官
貧甚至鬻幼女為道里費翔霄
閭惻然贖以歸之具好義類此

錢 策

浙江人進士萬厯間知程番府廉介明敏
剖決如神事上無筐篚之儀惟幬頭便面

而已常事知其廉益重之因與時齟齬
不得行其志投劾去起太常寺少卿

朱茂時

秀水人崇禎間知貴陽府剛明果決摘伏如神尤喜下士凡經獎拔卒成令器

楊以成

字太和雲南路南人以選貢為貴陽府通判分署畢節衛論勞陞本府同知仍駐其

地天啟二年水蘭構亂以成潛具蠟書告變滇撫發兵來援賊圍衛城以成督滇兵與戰却之已而賊兵大集勢不敵以成知事不濟令吏懷印乘夜取徑路走貴州自以死守當賊鋒未幾城陷以成投繯不死賊殺其家口擁以成及其弟以榮入營以成乘隙又將賊中情形函竹附以榮復入滇告變行至散納溪為賊所獲事洩以成不屈遂遇害前後同死者共十五人事聞賜奠祭贈光祿卿廕一子錦衣世襲並勅建祠於其里春秋祭祀

梁思泰

籍貫未詳貴陽府同知天啟三年督餉征水西遇害事聞賜祭贈按察司僉事廕一

子入監祀
忠烈祠

王尊賢

閩中人性剛介博學能文嘉靖間貢至太學時上好方士人莫敢言尊賢撰聖學要

義中和衍義上之及諫立東宮忤旨下獄已而上閱其書竒之謂輔臣曰布衣敢言當世事忠臣也釋其獄授程番推官有異政致仕歸一貧如洗

郭鳳儀

陝西人崇禎十五年任貴陽府推官分駐龍里謹嚴防禦觀農課士方正廉隅

王守仁

字伯安餘姚人弘治進士正德元年戴銑等劾劉瑾被逮守仁時為武選司主事上

疏爭之瑾大怒杖闕下謫貴州龍場驛丞至龍場學蓋進葺何陋軒君子亭自為記諸生從之遊始知性命之學瑾誅後歷巡撫南贛擒宸濠封新建伯謚文成從祀廟庭

李

順

洪武間前衛指揮有能名雅尚恬退常守安平調度有方後致政歸開軒延儒大詞

煥發優游三十餘年壽八十卒

余生

前衛人少好文雅善騎射有勇畧累從征討自部卒至指揮

洛忠

貴州前衛指揮使弘治間征米魯之亂竭力捍禦安南諸城賴以保全

朱暹

前衛千戶少尚儒雅正統間副使李睿以將才薦力避不就尚書王驥征思仁至金

沙江暹以利涉之策進驥用其言深器之班師授武德將軍署黃平所令肅政平兵民安堵

胡朝棟

貴州衛千戶性慙直見義勇為崇禎間以憤擊水西目把事被戮臨刑引頸就刃毫

無懼色士民至今寃之邑人吳中蕃有傳載藝文志

宋 昂

襲宣慰使好學工文守廉持儉苗有弄兵者昂必自咎於政不加誅責以故苗民輯

和又多收經史以崇文
教與其弟昱皆有詩名

宋 昱

宣慰昂弟性穎敏好學能詩
操行端飭著有聯芳文集

王應昌

嶠縣人舉人萬厯間知定番州蒞任之初
修黉宮設書院置郵隱局養濟院惠政頗

多

陳新第

長壽人崇禎十五年知定番州禮士愛民
士民戴之丁亥春孫可望寇定番新第誓

衆堅守並駐兵要害逆戰先後殺賊數百城破縊
死於署內馴鹿堂同時戰歿百五十餘人知名者

五十餘有王睿殉難紀尹
璉五忠烈合傳載州志

尹大任

陸涼州人任定番學正同新第守城城陷

步北拜縊死於明倫堂左柱時訓導徐鑣州吏目
安紹祖廣順州吏目周齡六奉調守定番城俱自

縊死

陶世顯

威遠衛守備趙定番同守城統右師敗賊
於土橋斬首百餘級生擒二十一入越四

日又與勇士簡成書更番迭戰殺百餘賊以賊聚
師寡世顯血戰死成書歸守城以藥矢射中賊將

艾能奇後藥發死城破成書
巷戰猶格殺數賊力盡死

柏福兆

臨清人舉人崇禎間知廣順州撫字
有方建學宮設廩餉士民咸德之

黃嘉雋

鄧縣人貢生崇禎三年知開州建城垣編
里甲課士通商民甚德之後土苗作亂陷

城罵賊觸堦死子近哀近戾殉焉
吏目鼎禁亦同死士民哭祭三日

賈武

龍里指揮練達
有為兵政克舉

井孚

龍里衛鎮撫林寬之亂與吳得守城
盡節事聞贈千戶以子襲職恤其家

王信

龍里衛指揮僉事隨鎮遠侯顧興祖勦平
廣西柳州馬平縣賊陣亡郡人祠祀之

吳得

龍里千戶洪武三十年古州蠻林寬攻城
燒四門得謂鎮撫井孚曰我等為國守境

且父母在城不守既不忠又不孝也何用生為遂
馳賊軍殺數十人中毒弩死事聞太祖曰忠孝人

所難全吳得井孚臨難捐軀因忠顯孝
烈大夫也贈指揮令世襲仍恤其家

黃光中

江陵人舉人崇禎間知貴定縣
平易近物捐俸修城不煩民力

楊世桂

籍貫未詳新添教授古貌古心有學有守却贊恤貧刻書造士多所成就

王璧

蔚州人新添衛鎮撫當開創之初修城垣設衛署建倉廩諸務畢舉

史昂

正統間新添指揮練達政治軍民悅服

嚴勝

新添指揮同知有才幹事關民生勇於擔荷每巡營屯威令肅然

陳忠

新城人永樂間討交趾松潘功陞新添指揮同知素有謀畧善造鎗砲諸利器正統

間苗賊攻城偕其子率衆堅守城賴以全

柳國柱

武進士新添指揮天啟間值安賊圍城國柱同推官李若楠率衆堅守城賴以全

白尚文

新添世襲千戶天啟二年水西叛圍省城尚文率衆赴援遇賊於甕城橋力戰而死

事聞加指揮同知
立祠於橋祀之

安順府

晉

爨

深

興古郡人楚令尹子文之後受姓班氏西漢末食邑於爨遂以為氏世為鎮蠻校尉

晉武帝時深為興古郡太守永嘉中與將軍姚岳同破李雄咸和七年雄遣其弟壽及費黑攻朱提郡太守董炳寧州刺史尹奉徵建寧太守霍彪及深援之壽怒遂攻寧州破之奉彪炳皆降惟深與謝恕始終為晉九年分寧州

置交州以深為交州刺史

元

趙將士

普定總管府通判立學安邊政平
訟理夷人畏服懷德立碑祀之

容直

大德中授普定知府時蛇節宋隆濟等作
亂直率眾禦之與其妻適姑宣力戎行遂

改府為路而以適
姑為總管佩虎符

益智

普山夷長有謀畧善安輯官至懷遠大將
軍曲靖宣慰使掌普安路總管府諸蠻服

其威信樹德
政碑頌之

金容刀

沙漠人以將軍守普定明
傳友德克城容刀死之

明

蕭傑

郡人洪武初為十二營長
官子惠部落境內康乂

阿窩

郡人洪武初率衆歸附授土通判安輯人民一時稱能

溫伯壽

普定人洪武初以才幹授西堡副長官招撫夷民咸納款誠

孫森

海陽人舉人天啟間知府時值安氏叛後修城建學分甲定賦一切制作皆其經畫

廉介不阿為直指所誣事下督撫為之申辨乃得白詔復其官竟引歸

劉肇

萊陽人景泰中知安順州宅心惠愛治事端謹秩滿部民攀送盈道

李騰芳

知安順州愛人下士政治修舉夷民素驚抗賦芳化之乃就約束一如編氓舊志

不載籍貫職官中並遺其名又別無可考姑仍之後夏祈等倣此

夏祈

知安順州鯁介有守處事公平

彭 蠡

洪武間安順州同知
創制行政井井有條

王 斌

普定衛指揮廉能公平蒞
政三十餘年始終如一

王 銘

普定指揮同知征麓川戰
死賜祭進子泰官一級

陳 忠

普定指揮驍勇過人從征麓
川攻擊舊大硬寨戰歿賜祭

陶 英

普定百戶從征廣西麓川東苗草塘四十
餘處累加指揮使成化間調征山都掌蠻

出哨遇伏力戰

死贈都指揮

倪永壽

桃源人舉人鎮寧州知州和易清
簡教民力農巡行畝畝不憚勤勞

黃 琳

鎮寧知州正己
率人向化者衆

蕭顯

山海關人成化間為給事中因言事忤旨謫鎮寧州同知顯至任政尚寬平暇則與

縉紳遊覽吟咏尋連
衡州府同知終副使

趙貴

洪武間鎮寧州佐因俗成政撫馭有方一切創建多貴之力

李新

茂州人安莊訓導講明理學以誨諸生捐俸賑貧自甘淡泊九年扶滿諸生留之遂

附籍
永寧

蕭伯辰

清江人洪武間任安莊衛經歷有經濟才累官兵部侍郎

李斌

鳳陽人安莊衛指揮僉事簡練有方屏翰以立任二十年上下宜之

周節

臨淮人安莊衛指揮僉事持重有為尤善騎射

張

融

洪武初知永寧州創制之初殫心經畫卓有規模民皆悅服

葉

泰

荊州人宣德間知永寧州蒞政愷悌苗民咸化

陳

佐

江西人宣德間知永寧州沉靜端謹長於撫字

段絲錦

嘉靖間知永寧州廉幹有為民咸信服

吳敦本

浮梁人隆慶間知永寧州心存愛民每有善政

楊東明

平壩千戶萬厯丁未仲賊劫掠沙作站東明挺身禦敵賊暗伏壕外東明乘勝擊之

戰死於壕

張

琳

四川人正統間任威清衛訓導誨迪有方士沐其教

車

輔

平埔人新興站百戶弘治十一年征米賊之亂輔率兵死拒後賊萬餘逼輔歸順輔

手刃七賊被箭而死是日天晦提學毛科為之立傳

羅

鼎

益陽人弘治間以貴州宣慰司訓導署威清學正捐俸修學勤於啟迪絃誦為之一

振

楊

遵

威清指揮永樂間創城池立堡戍有功於衛洪熙元年卒遣行人呂讓諭祭

楊

芳

貴州衛人守備威清米魯之亂有保障功

平越府

宋

宋勝

郡人嘉定中授右武大夫沿邊溪洞經畧使

元

宋朝美

勝曾孫父提巴蠻都總管朝美累官新添葛蠻安撫司

明

范鑛

富順人進士撫黔有政聲解任後避亂於蒲潭遂家焉

劉冠南

廬陵人舉人萬厯間知府修黃蒲餘甯四州縣城興學字民為開創良守

楊可陶

嘉定州人舉人萬厯二十九年任府同知性嚴重果於任事時改設府州縣治修築

城堞闢水城建署道橋勞勛最著陞知府

萬尚烈

南昌人舉人萬厯間知府遷建學宮教習士類人大蔚起

馮國正

江夏人舉人泰昌元年知府時安酋叛國正與守道朱芹戮力守城間出銳兵擊賊

國乃解以

廉愛著聲

陳紹英

仁和人舉人崇禎間知府修城建學有愛民實政民間立祠祀之

鄭廷英

南川人以府同知署黃平州事值歲大旱廷英步行泣禱雨立應聽斷明決民呼為

神君肖

象以祀

方明棟

富順人舉人平越府同知天啟三年監軍進討水西遇害事聞贈按察僉事廕一

子入監

賜祭

董邦昌

昆明人舉人崇禎間任平越同知多善政值黑苗叛薄興隆城邦昌多方捍禦賴以

保全後陞
思恩知府

王衍

弘治間平越府訓導修學宮置祭器啟迪有方士論難之

王先

洪武間平越衛指揮僉事智勇兼長苗蠻畏服

奚國柱

平越衛指揮撫士卒以廉惠稱建西門水城以便民汲退隱二十年貧無半厦就屋

以居

李福

定遠人洪武初為平越衛指揮同知相形勢創建土城以資捍禦今為府城

李山

洪武初從軍累著戰功為宜興衛指揮同知後以事降調平越衛僉事卒于官賜諭

祭優恤
其家

奚得

平越衛百戶驍勇無敵正統十四年苗亂圍城得開門直入賊壘斬賊甚多賊解圍

走得率二子宣宏追殺力戰而死幼子尚在襁褓尚書王驥訪其家月給米卹之

曹進可

江津人舉人萬厯中任黃平知州當建設初經理規制綱舉目張廉明慈惠不愧父

母

史應元

順天人舉人萬厯二十四年知黃平州東直不阿卒於官無以為殮民爭賻之乃得

歸

黃虞龍

廣東人舉人崇禎末年知清平縣時值苗亂內撫字而外禦侮備極苦心後擢黃平

州牧土賊藍二
攻陷州城死之

胡其仁

性純孝任黃平州指揮明崇禎壬午苗叛
圍城幾陷仁挺身奮力擊傷數人賊衆遂

奔城獲保全士卒凋殘與同甘苦民
間鬻男女者捐資代贖善政多端

周興

字隆岡滁州人洪武間興隆衛指揮時初
設衛題請賜名上即其名字取名興隆規

制俱擊
畫盡善

胡質

洪武間興隆指揮修城築
池屯田撫士頗多勞績

蕭琳

永樂間興隆指揮以廉推舉
掌印事重修衛城民不告勞

權安

正統間興隆指揮性
儉政勤嚴而不苛

狄雋

成化間興隆指揮持已以廉馭衆以寬修學開田頗著勞績

余洪烈

興隆衛指揮萬歷辛酉城西休徕苗叛洪烈率兵勦濫泥溝破塘寨中鎗而死

周鑑

正統間興隆千戶有勇謀過寇至出粟守城臨陣破賊武功表著

王榮三

本浙江上虞人膂力過人洪武初從潁川侯傅友德克取普安曲靖攻大理屢建奇

功至鶴慶與敵對壘奮勇陣亡世襲興隆衛百戶

張朝

如皋人洪武初設黃平所朝自貴州衛千戶改任黃平軍政修舉境內帖然

袁尚紀

江油人選貢萬歷間擢縣事捐俸建學敦教化以正人

心田立上中下三則
丁隨田辦邑人感之

韓任甫

瀘州人舉人萬厯間知餘慶縣政平訟簡才長操潔留心學校每暇輒召諸生講論

多所發明

儲至謀

靖州人萬厯間知滑潭縣天啟元年蘭州奢寅叛土逆王倫從賊攻縣出戰屢敗城

垂陷遂自焚

國朝

杜廣

諸暨縣人歲貢生順治十五年知黃平州當開創初撫字荒殘拮据六載心存仁恕

不事敲朴食惟脫粟衣皆布素每有征徭集衆共議必悅從而後行藹如父子以勞瘁卒於官黃民為之罷市殮惟有布衣一襲釀金備棺以其餘作賻輓乃得歸

羅鳴序

漢陽舉人任麻哈牧雍正十三年署州印值逆苗背叛烽烟告警鳴序身率士民捍

禦城池至四月二十七日苗賊擁至鳴序知孤城難保預解所佩兩州印令家人潛賫赴省入將庫金千餘擇地瘞之俄而城陷鳴序投繯死幕客陳憲素有俠氣鳴序勸之去不忍獨生同時俱死事定鳴序贈叅議賜葬祭廕一子入監憲贈國子監學錄賜葬祭俱祀忠義祠

都勻府

晉

五代

尹懷昌

郡人以雄傑為都勻長天福五年率其屬十二部附於楚

明

凌文獻

遂安人弘治七年知府
創學立署規制始備

杜禮

豐城人弘治中繼文獻為
守興學平叛功在封疆

趙延

劍州人官生萬厯
間知府廉仁最著

李時茂

乾州人天啟間知府重學校恤軍民值苗
仲倡逆圍城與民固守多所斬獲後卒於

官

李廣居

宜賓人都勻教授學問淵
博勤於訓誨士多興起

許衍

吉水人成化間都勻衛訓導學行
純茂克盡其職在任十五年致仕

陳原

定遠人都勻衛指揮偉丰儀饒材畧善謀
能斷民夷率服正統末苗寇圍城原罄家

財以饗士
城賴以全

李紹忠

貴州前衛人萬厯丁未武進士襲千戶官都清兵備中軍守備奉調征水西安邦彥

力戰死之事間贈二級
襲陞二級後祀忠烈祠

樊體坤

都勻衛指揮僉事值安邦彥叛調征大方陣亡題叙曰負英雄之志探虎狼之穴從

祀忠烈祠

從龍

安陸州人知麻哈州時民未知學龍聘名碩士訓之俗為之變民立祠祀之

張應期

號維杞鎮遠縣人明經清平衛教授天啟間薨壩諸苗叛應期佐副將胡從儀屢出

奇計勦平之攝縣篆愛民課士政皆可紀
居鄉方正樂易貧約自甘有君子之稱

司

鐸

河南人清平指揮洪武二十四年開設衛治創置公署築建城壘卓有能聲

石

宣

壽光人洪武二十五年調清平指揮捐地建學興賢育才讀書好禮廉公有威兵民

咸服事嫡母賈生母韋以孝稱

邵

鑑

清平衛指揮嘉靖初為迤西守備值芒部土官隴壽被殺隴勝詐稱壽養子求襲蜀

撫王輒奏改流官已題覆旋報罷再設土官蠻猶弗靖鑑乃奏叙瀘大壩為烏芒密邇芒夷出沒必往水寧乞添設參將一員挑選漢土官軍以資防禦事下本兵行川貴撫巡議覆報可永寧設叅將自鑑始時貴州初設科場鑑為督理區畫盡善至今賴之

何

振

清江衛千戶才毅勇果正統間香爐山苗叛振親至其巢曉諭之

孟果

清平人宋吉國公八世孫也任副千戶忠義自負正統末以先鋒禦寇力戰死

劉邦徵

籍貫未詳萬厯丁未任荔波知縣荔介黔粵極邊內蠻外苗交訐為患凡之官者皆

坐府城不身厯其城徵甫入境曰叱馭九折豈異人任乃視此為畏途也比至邑推誠撫諭諸蠻凡有徵發悉皆聽命請於上官置縣治於喇軫村厯任數年羣蠻帖服百姓思之立祠以祀

鎮遠府

明

顏澤

江陰人永樂十一年初設鎮遠澤為知府勤政恤民政滿民請留復任宣德元年澤

遷建府治創署立學政績居多厯官福建叅政

張英

揚州人永樂間以御史出守鎮遠清介有守政事修舉宣德七年卒於官

劉善

泰安州人舉人正統元年知府多慮政才學敏贍政教兼施公餘進諸生講論經史

竟日不倦
多所造就

毛鳳

嘉定州人進士授戶部主事天順四年守鎮遠肅介不苟平易近人七年卒於官

王敘

臨汾人監生成化七年知府事神恤民俱有實政

沈熊

歸安人進士成化十五年知府孳孳為治嘗遷學宮議建府署未幾憂去徐虔繼之

一遵其
規畫云

徐虔

揭陽人進士成化十六年知府通達政理遷學建府卓有成績

李 曷

汝寧人監生成化二十年知府奉公持法以忠謹稱

周 瑛

莆田人進士弘治初知府博學能文勤於政事請建城置堡碩畫鑿鑿厯官四川布

政使

戴 仁

大理人舉人弘治間知府舊有羨稅前守多私之仁至盡裁革亦不暴於當道或勸

之上聞仁曰張已形人非吾心也考最晉松茂兵備旋致政歸里不治第館賓於門設榻於屏自號無懷先生卒之日家無餘財郡守吳晟為之殯殮

劉武臣

宜賓人進士正德二年知府潔已愛民為政不擾公事之暇親課諸生去後民為立

祠祀之

羅鳳

上元人進士嘉靖三年知府有善政能詩鳳舊與周瑛善先後出守作懷周堂又建

德禮堂後守程燾為之銘

黃希英

莆田人進士嘉靖間知府善詩文興行教化建紫陽書院於中和洞自為記遷長蘆

運使未行卒

廖梯

莆田人進士嘉靖間知府清苦自持常掃梧葉代薪秩滿致仕

程燾

建昌人舉人嘉靖二十六年知府視官如家視民如子才氣揮霍而詩文藻續足潤

色之凡山川崖洞無不經品題者城垣衙署次第修建續修志書尤詳核衛軍雷文七等欲鎮民幫貼夫價呈楚撫按燾具移詳辨議乃得寢至今守為定制在任九年歸無餘貲居一樓兄子鬻其半

作籬自障有詩
曰風雨半間樓

阮宗道

大同人恩貢萬厯十九年知府
勤政恤民設立哨卡民賴以安

張守讓

字懋功南海人舉人萬厯間知府時兵燹
之後民苦供億驛馬之累十室九空讓甫

下車首為調停百廢具舉捐俸羅救贍士賑貧建
石橋以利往來備火器以防苗變建坊勵俗飭儉
維風善政不可悉舉
秩滿擢本省思仁道

徐璋

重慶人鎮遠府同知永樂十五年
建山川社稷郡屬等壇政有遺愛

黃鑑

新喻人正統間任鎮遠通判才
識俱優以禮義率民風俗丕振

周仕達

鎮遠指揮天啟三年征水西
陣亡贈都督僉事祀忠烈祠

何瑄

郡人先為鎮遠土知州後裁州改授土同知為人沈毅剛果有遠識熟於事機正統

天順間麓川印水諸苗相繼叛瑄領土兵協勦屢建奇功子砥孫馴天衢先後俱登賢書

何騏

土同知成化中充服銅鼓石羊等苗欽賞絹紗

何魯

土同知弘治初出方畧平諸苗

楊貽業

土通判居官勤慎嘗率兵應援會省勦堵江苗皆有功以詩文樂志

楊薰

土通判居官以清慎著捐地以廣學宮輸材木以成府治其公爾忘私類如此

楊載春

土推官欽之子也篤志好學弘治戊午舉人襲非官屢征有功嘉靖四年加俸二級

授正六品職事

劉以仁

孫洞司人安苗叛以守
備督兵援省力戰死之

陳應正

字國啟雅州人舉人知鎮遠縣
清操自勵解組歸行李蕭然

李珪

昆明人監生天順間知施秉縣
始遷縣治才識優長多所經理

劉宇

鈞州人進士成化三年以貴州巡按御史
降施秉縣典史適虎為民患宇牒城隍明

日兩虎相噬死患遂
息後起吏部侍郎

許國柱

偏橋衛指揮天啟三年隨父攀
龍征水西死於戰壘祀忠烈祠

朱梓

淮安人萬曆十九年任天柱所吏目條議
建縣撫綏苗蠻二十五年陞知縣建學校

擴城垣清田賦編里甲立社學安甯堡
創市鎮百務具舉為設縣來賢令之冠

李紹道

清江人萬厯三十五年知天柱縣清靜寧謐不事紛更凡前令所經畫悉遵守勿改

民苗愛戴立祠
縣旁尸祝之

韓可興

長葛人萬厯三十八年知天柱縣居官嚴厲不輕笑語苗人聞風畏服四境無虞去

之日民立
祠祀之

王昌

富順人副榜萬厯四十六年知天柱縣政事文章卓然可稱去之日士民肖像以祀

趙海

四川人天啟二年知天柱縣除陋規革公費正斗斛繩吏胥以循良稱

陳朝疏

烏撒人萬厯二十五年天柱教諭時初設縣學中虛無人請於朱令擇童子俊秀者

二十九人給衣巾至學肄業又請撥靖州會同兩學諸生三十人附於學以為表率多方鼓舞邑中

人文振興自
朱陳二人始

國朝

卜世儼

上元人康熙甲辰武進士任鎮遠衛守備
南半載吳三桂陷貴州總督甘文焜至鎮

達遇害城陷儼自經死康熙二十四年巡撫
慕天顏請卹贈都司僉書廕一子為衛千總

思南府

宋

田佑恭

思南人字子禮有膽識為番部長政和間
被召入覲拜伏進退不類遠人帝嘉之建

炎初劇賊王闢等破歸州將板瞿塘奉調破賊保
安蜀境屢書加勞遷通侍大夫知思州軍事勲業

最著子孫
世其官

龐孫恭
為運使築思州婺川城因
山控扼建寨堡以備要害

明

田仁智
思南宣慰使太祖平陳友諒仁智遣其都
事楊琛來納元所授宣慰詔太祖以其率

先歸附俾仍為宣慰使以三品
銀印給之並授琛為宣撫使

陳禮
泰和人進士永樂間知府時削宣慰田氏
初設郡治編戶立學諸務具舉開疆著績

何輒
四川人景泰間知府
興利除害頌聲洋溢

王南
長壽人成化間知府才智穎敏不撓於
物恤孤教士重葺府署學校民不知擾

金爵

綿州人進士弘治間知府宅心仁恕祛積弊革橫征立五年四空之法以編徭民懷

惠其

羅璞

吉水人舉人弘治間知府重建府治興學校繕城垣至今人利賴之

甯閱

湯陰人舉人正德間知府廉正剛直文武兼資時蜀寇逼境民間攜挈負貲竄入崖

穴閱廉知之慨然以死守自誓盡撤渡艇躬自巡警嚴禁逃匿率民兵以禦之深溝重壘賊騎不得開入值鎮算兵經過閱借其聲援建畫出奇遂破賊運運使去民皆扳轅涕泣不能舍

周舉

鄭城人進士嘉靖間知府宅心正直剖決如流獄無淹滯尤善作人每召諸生講論

經藝多所發明遷雲南副使未任卒

葛

鳴

萬全人舉人嘉靖間為給事中出守思南剛毅廉慎多積穀以備荒有疑獄禱於神

立決遷本

省副使

李夢祥

監利人進士嘉靖中以虞衡郎中出守思南鎮算苗叛剽掠隣邑時郡無城垣祥至

乃建議創築期月工完遂成保障

楊

煦

進賢人舉人嘉靖間以南工部郎出守思南時鎮算苗叛煦多方禦之郡賴以全雖

兵戈中猶與諸生講學不輟後掛吏議去士論惜之

宛嘉祥

廬江人舉人嘉靖間知府繕城隍修學校建公署提調木務更定馬政調停里甲莫

不井井治郡六年稱能吏

李充善

長治人舉人嘉靖間知府性朗才練清操可資鬼神修學葺城創養濟院禁私征清

寬抑定馬牌嚴保甲杜請謁肅吏胥時盛夏不雨善禱輒應郊有虎患善祝於神遂息以內艱歸士

民卧轍以留

田稔

高唐州人進士隆慶間知府心存愷悌剔弊除奸吏畏民懷立祠祀之

帥機

字惟審臨川人隆慶戊辰進士萬厯九年以南禮部郎知思南古道自持不諧於俗

而廉幹有能選學問善吟咏尤加意學校獎拔士類多所成就

陸從平

華亭人隆慶戊辰進士萬厯十五年知府文學優瞻吏事精敏約已化民修舉廢墜

懲積猾鋤強梗新府治立條編貽利無窮士民德之

溫可貞

廣東人舉人萬厯間任府同知廉潔有守政多平恕秉公持法人不取干

李悅

莆田人成化間思南教授文學宏肆尤精於易以授諸生得其傳者咸有可觀

趙富

印江人思石營把總戊子張先壁叛將入印富守秀竇關報城中令居民連徙曰吾

以身代羣命矣於是守關拒賊援兵不繼被執死之

朱凌霄

南海人舉人萬厯間知安化縣車有循聲

萬應奎

南昌人舉人天啟間知安化縣值安賊圍會城監軍進討遇害事聞贈光祿寺少卿

廢一子入

監賜祭

周文

山東人弘治間知印江縣清介愛人有治劇才始建縣治制度恢宏不任威力吏民

悅服

莫與京

廣西人舉人萬歷間知印江縣公恕慈愛修舉廢墜時稱循良

張鎔

合州人舉人萬歷間知印江縣清廉仁恕建學宮定規制卓有政聲邑人歷久猶頌

之

劉兆桂

閬中人萬歷間知印江縣有文名撫民訓士曲盡勤懇

史諫

貴池人崇禎間知印江縣才敏政寬審編丁糧尤著公平

熊价

眉州人弘治間知婺川縣公廉果斷修縣治築城垣後以誣去與論惜之

王緯

平彝人正德間知婺川縣時土賊行劫逼近縣治士民空城遁緯獨持印坐堂誓與

城同存亡衆復歸協力
固守賊聞之亦引去

藥恕

山東人嘉靖間知婺川
縣修建學校有功於郡

劉敏之

山東人嘉靖間知婺川
縣建學造士築城衛民

石阡府

明

李鑑

貴溪人進士永樂十一年
首任知府創制立法導民
變俗九載秩滿遞留載道

胡信

廬陵人正統十二年知府
政舉民和十三年蜀後洞
黑苗叛攻破府城信罵賊
不絕

遇害

楊榮

青神人進士天順八年知府律已嚴而待民恕興廢舉墜美政甚多

余志

建寧人進士成化十五年知府政績昭著傳胡知府王烈女以崇節義作風鬼洞龍

洞辨以祛民惑是時陰雨彌月作露
靈文以訟之剛直之氣凜於冰霜

祁順

字致和東莞人進士為名儒陳獻章高弟成化十九年知府才敏學優多所題咏纂

郡志興學校
為名太守

丁晁

字德輝蒙化人進士弘治間知府建府治儒學及公署倉驛咸新之嚴守衛賑貧乏

逃亡復業卒於官有烈風星殞之異囊無
餘貲衆賻之始得歸觀著有公餘清咏

任儀

閩中人進士弘治十四年知府賦均訟理普安兵變有轉餉功

施震

平湖人進士正德間知府寬洪簡重綏戢苗民

褚松

華亭人舉人嘉靖十五年知府省夫馬抑豪強課士濟貧以直道不容去部民如失

特怡

朱黼

安福人舉人嘉靖二十三年知府才幹敏給庭無留牘濟嚴以寬士民戴之

蕭立業

新喻人選貢嘉靖三十六年知府操守廉靜採大木餘千金不私諸已以建公宇創

城梵石薄飲獨
征稱廉能太守

王管

江寧人官生嘉靖四十二年知府寬洪簡易練達公平繼蕭守修城加堅固焉

李充

餘姚人隆慶三年知府修葺城垣捍禦有賴均大民田糧差除減宿弊一清修有郡

志今多
散失

吳維京

孝豐人進士萬厯間知府
明有威振興士類物望甚隆

鄭一信

惠安人進士萬厯間知府
為政持大體尤加意學校

陸郊

上海人官生萬厯間知府
如子捐俸購古今書籍貯尊經閣以訓士

厯久猶
頌之

康穎

字宜清泰和人進士永
樂間任推官多惠政

鄭廷璋

瓊山人舉人嘉靖三十四年推官
持刑明允操守廉潔豪強屏迹

李應期

鄞縣人萬厯間推官獄無冤滯
圖為之一空修學興文著有異政

吳衡 揭陽人永樂十三年府教授盡心課士兼富文學有建學記

楊彬 秦和人舉人正統五年府經歷勤於撫字惠愛及民尋以憂歸民請留之服闋再任

年九

周冕 南昌人宣德間府照磨文章政事聲聞一時

凌秋鵬 昆明人貢生萬歷間知龍泉縣時初設縣一切規制皆其創暨

段宜標 雲南人舉人萬歷間知龍泉縣甫下車請減浮賦民困立蘇移建縣治規畫有條

李紹勲 建昌人貢生萬歷間知龍泉縣始建學宮士風振起

趙謨 昆明人舉人崇禎間知龍泉縣政以肅成不避強禦吏憚民懷擢御史後闖逆陷京

城死難
最烈

思州府

元

黃原銘

思州人才智過人民吏親
附以薦任沿江安撫司

明

田仁厚

元思州宣撫使至正二年明太祖時經畧
荆襄仁厚遣其屬林憲張思溫來獻鎮遠

思州軍民二府并十縣三十四司命改宣撫使為
宣慰司仍守其地子洪正於洪武五年從征羣蠻
授中順大夫思州宣慰使子
孫世襲八年復授亞中大夫

劉貴

思州人宣撫司同知明洪武初贊田氏稱臣入貢五年以忠順授宣慰司同知

黨宗仁

思州人洪武間以才幹任宣慰司僉事

崔彥俊

新建人進士永樂間知府時方草創撫綏流亡編定糧差政教維新在任一十八年

纂修

府志

賀讓

衡陽人舉人宣德初以瀘州守遷思州知府撫馭有方民夷安堵致政歸臨行惟市

涯青數石為身後計餘無所攜今廟食思州

王常

馬湖人進士成化元年知府公平勤敏修葺廢墜重建城垣

張介

內江人進士成化間知府老成諳練修治郡學親為講究士習一新

李

概

豐城人舉人正德間知府行政寬大惟務綏懷時有枯榴復榮之異

高節

上元人進士正德九年知府勞來安輯以經術訓士征苗寇有功擢叅政

張柱

涪州人進士正德間知府性剛直禁止淫邪作興士類重建學校士民感德

毛希源

太倉人官生嘉靖間知府力行化導禁暴止邪民大輯睦歲餘以疾乞歸士庶攀留

歌思不已

李允簡

融縣人舉人嘉靖間知府時銅仁苗出寇倉卒不及備被執以行投崖而死事聞賜

祭奠贈

按察司

副使廕一子

符仕

寧陵人舉人嘉靖間知府性剛果清介值殘破之後築城垣以衛民恃為保障

蔡懋昭

字允德上海人舉人萬厯初知府時改遷府治城久圯人無固志昭經理修建撫輯

安定去後郡人祠祀之

李仕亨

銅梁人舉人萬厯間知府置田贍士賑恤孤貧惠愛為多

趙建

劍州人萬厯間知府撫勸苗賊多著勤勞

胡枏

洵陽人舉人萬厯間知府修城造士勸苗有成績民建祠祀之二十餘所

萬嗣達

九江人舉人天啟間知府有惠政士民公舉崇祀

檀凱

永樂間通判洪熙元年秩滿郡民詣闕請留宣宗聞而嘆曰貴州至北京甚遠民

跋涉艱難求其復任必撫字有道者遂遣還任予正五品俸以優之

唐賢

蘭谿人永樂間推官持身整潔刑政修明

王制

字宗明雲南舉人萬厯初推官勤恤民隱督理均田人稱其平

鄭泰

平溪衛指揮使景泰時禦苗有功

銅仁府

明

田載

北平人永樂十一年設府首任府事草昧之初結廬聽政招集遺氓次第開闢踰年

官署學宮規制粗備外馴夷僚內撫瘡痍極苦心

王恕

長清人進士宣德六年以編修出知銅仁府時軍興財匱恕請罷礦場內使巡場御

史及同知等官後因礦盡課無所出
復請罷金銀場至今無採辦之苦

張隆

雲南臨安人監生天順間知府雅尚文教
日集諸生於庭而訓迪之士始知學自奉

甚約俸入所餘悉付外庫以代租稅
之不能輸者以勞卒於官貧無以殮

陽顯嘉

吉水人進士成化三年以工部員外郎擢
知府捐介有執持扶獎善類不事博擊時

郡署燬於苗嘉捐俸營
建一切公用不以累民

周銓

興化人舉人成化間知府廉潔寬恕尤加
意士類課讀惟謹一時人才多所陶鑄以

學宮卑隘勸民輸地
拓而新之遂成壯觀

堯卿

安岳人進士成化間知府以恬靜為政事
上之禮甚簡嘗曰剝民以求媚吾不為也

民有爭訟出數語直之立解有刑措之風

周汝瑞

長寧人舉人弘治中知府興學撫叛民苗懷服

徐紹先

蕪水人進士正德五年知府時鎮筸苗作亂先繕城堡備芻粟治器械募民間勇士

數百人教以技擊苗聞而憚之不敢犯境

李資坤

昆陽人舉人嘉靖間知府有惠政興學造士始終不倦先是舊城狹民多居郭外恒

慮苗患坤相城北曠土可城召民入直為業即以其直城之拓九百餘丈興大役而民不擾

馳九垓

仁壽人舉人弘治間推官獄鞫多所平反值洞苗倡亂不避險難入其巢穴撫馭之

卒寢其甕歲饑請賑不待報而發或難之曰民旦夕急寧我無官不忍民無食也

勞周相

德化人監生嘉靖十六年任推官先德教而後刑罰吏民有弗率委曲開諭使知向

化鮮罹
文網者

唐宗正

靖州人舉人隆慶五年推官剛果明決摘發如神嘗奉檄度田躬行阡陌中按畝定

則不假手左
右賦稅稱平

趙

和

字達道自勵丁內艱服闋改鐸建始上官奏留

之許還復丁外艱去將改選又乞還如初監
司皆稱曰先生後致仕歸諸生遮道泣送

謝寧

蒼谿人嘉靖二十七年銅仁訓導性樸寡言笑諸生有過溫諭之不悛峻詞切責

靡不愧悔課文考業俱有常程即
寒暑不少輟一時得士彬彬焉

裴坦鼎

靈山人監生正德九年銅仁經歷直勤敏事事有條理護郡篆能攝吏胥裁里甲

鑿泮池建號舍

皆捐俸充之

楊任漢

景東人舉人萬厯間知銅仁縣心存撫字卓有聲稱

黃家林

汝寧人選貢天啟間知銅仁縣愛民訓士誠心感人

黎平府

梁

楊再思

據誠州稱刺史然有功於民士人尸祝之宋追贈英惠侯

宋

白通宸

真宗咸平元年通宸以芙蓉硃砂二器馬十匹水銀千兩入貢詔有司鑄印賜之大

中祥符初詔
加古州刺史

明

黃

恭

上海人舉人正統中以刑曹郎出守贛州尋調黎平崇尚實政惠治小民時苗亂逼

近郡城恭招募丁壯預儲糧糗定計討賊遂平之招集流亡出俸賑饑九年滿去民咸思之

楊

緯

大理人進士以戶部郎出知黎平持身廉慎費官就圮緯更新之方祀典廣生儒郡

中諸務釐然興舉任黎六載治績最著擢山東叅政

袁

盛

襄陽人進士成化間知府政平訟息有刑措之風

張

綱

滁州人進士弘治間以御史出知黎平時府署狼陋綱改拓之又市地以增學宮性

耿介政期必行然以愛民為主去之日合郡如失怙恃

張愷

無錫人進士弘治間知府躬行化導政務拊循擢兩淮運使

余桂

綿州人正德二年知府果毅有為多所興革未幾調守黃州

祝壽

厯城人進士正德中由兩淮運同擢知黎平剛正沉毅禁令整齊編置里甲民皆稱

便賢聲上聞
遷雲南叅政

孫繼魯

字道夫雲南右衛人進士慷慨有大節嘉靖間守衛輝以忤權璫被逮民攀號載道

縱騎捶之不肯去後事白調黎平守治郡三載體察民隱罷里甲省繁苛清白之名著於海內擢湖

廣提學

劉汝順

清江人舉人嘉靖間知府居官簡靜奉法循理苗人初不知學汝順請於學使拔其

秀者為弟子員以獎勸之五開衛軍糾眾跳梁自以為別屬不可治汝順密陳其不法狀盡按治之郡中乃平府稱軍民始此

素表

晉江人進士以戶部郎出守黎平修學訓士詰戎戡苗邊境乂安

熊廷相

豐城人舉人崇禎間知府值皮林寇變殫力供億秋毫無擾郡民頌德不衰

于元葉

東阿人慎行孫崇禎間以刑部郎守黎平值明末武弁縱橫葉駕馭有方無敢或肆

劉行政

華容人景泰初以明經任推官膽智過人正統末苗賊攻劫城堡政毅然提兵出親

冒矢石深入巢穴諭以禍福賊不敢加害遂降四郊乃得晏然

徐馨

咸寧人舉人正德間推官獄平允治績爛然遷臨清守

胡宗政

松滋人舉人景泰初由鴻臚序班為經歷機警有方畧時廣西苗人與西山洞徭相

讐殺當事者屬吏撫之不聽宗政入洞中為折曲直徭苗並服事乃息

趙禧

字景福河陽人以鄉薦知永從縣有廉惠聲尋以內艱歸遂不仕

大定府

漢

濟濟火

祥柯紳善撫其眾聞諸葛武侯南征積糧通道以迎師遂佐武侯平西南夷擒孟獲

封羅甸國王已乃攻普里諸
種拓其境土即安氏遠祖也

唐

阿

佩

開成元年為羅甸國主率土
夷內屬會昌中襲爵為王

普

露

昆明大鬼主羅甸國王天成二
年募化來歸率其九郡入貢

宋

普

貴

一名字貴開寶中詔諭西南
夷普貴遂納土歸順賜王爵

元

阿
畫

一名阿拂普貴之後至大元年授武畧將
軍順元等處軍民宣撫使泰定間賜名特

爾穆

明

靄

翠

阿查之後仕元為四川行中書省左丞兼順元等處宣慰使洪武四年與同知宋欽

歸附以翠為貴州宣慰使統四十八部號最強

趙

顯

烏撒指揮征麓川戰死賜祭

管良相李應期

俱烏撒衛指揮天啟壬戌年烏酋入寇圍城九月人民乏食城潰良

相與應期閉門舉火合妻子共焚死題旌祠祀

朱運泰蔣邦俊

俱烏撒衛世襲指揮烏酋入寇城陷運泰與邦俊先自殺其妻女隨

自刎死題
旌祠祀

湯明

洪武十四年畢節衛指揮時初設衛治建城池開道路皆其經始功績甚偉

李興

洪武三十年畢節衛指揮與弟隆以磚石甃城畢節險要可據皆其力也

唐諫

畢節指揮才力過人兵政克舉以所居第建學征麓川戰歿事聞賜祭進子官一級

蔡禮

和州人永樂間貴州前衛指揮調烏撒衛宣布恩威申明禁令繕城修署時稱賢將

薛紹宣

貴州衛人萬歷二十九年守備迤西威懾烏蠻道無剽掠

李朝陽

黃平州人萬歷三十五年守備迤西威惠兼施蠻人悅服

步上達

四川人崇禎初守備克復烏撒重建城署大有能聲

丁

祥

赤水指揮正德間攝衛篆和平練達莊事五十餘年老雅頌其德

李

瑞

赤水指揮正統間攝衛篆以廉著寬厚有儒將風

張

佐

赤水指揮夷阻大道領兵開路戰亡土人祀之

張奇韜

張大壯

俱赤水衛指揮使奢寅亂攻城韜督軍堅守城陷戰亡

附載明天啓三年從征水西死事籍里莫考叅

遊都守三十五人

舊志載三十六人內有王達見遵義府志今止列三十五

人

陳濟民

劉應龍

劉仲時

楊鯨

羅袍

五人俱參將征水西死
事聞賜祭贈都督無事

襲陞
三級

李師沆

張纓

宗延齡

聶應德

周國臣

陳富

楊通增

王建中

遊擊
八人

藍補袞

劉廷舉

馬武

余報國

都司
四人

王得勝

田有龍

周國用

龍國正

曹柱

易登洲

覃事君

劉象麒

羅承富

曹思敬

張俸

張懷邦

董兆麟

陳我謀

耿良將

覃天印

羅承寵

黃中和

守備十八人以上遊擊都司守備共三十員名征水西死事聞炤本職贈二級

襲陞
二級

國朝

楊馥

陝西西寧人大定協副將整營伍練士卒恒如敵至雍正十年台拱苗變鎮臣臬司

俱陷圖中餉道不通檄馥往援時賊聚甘肅嶺築壘扼險以扼我師馥奮勇率土兵二百揮戈先登

殺賊甚衆中鎗傷脇血迸出猶負創發一矢手刃
二苗佯謂我偶被石傷耳汝等當急擊無失言訖
而殞事定贈恤有加
廕其子恒新為遊擊

南籠府

明

陶文靖

萬縣人宣德間知普安州裁決
庶務皆迎刃而解時稱能吏

素寧

新化人宣德間知普安州廉介有為時諸
夷爭地互相攻擊屢年不決寧力解之後

以誣去普
民惜之

黃雄

烏程人進士弘治間知普安州廉潔不苟
每巡行裏糧自給絲毫無取又明察善斷

從前積弊
一時盡除

徐世用

宿州人嘉靖間知普安州剛直不撓民資保障苗夷有不率者以德懷之遂遵約束

不敢
攜貳

王徽

南錦衣衛人天順間為給事中以糾權璫牛玉罪中官惡之摘其語以激上逮下獄

謫普安州判徽至任克修厥職不以遷
謫為嫌弘治間起山西參議引年去

張瀾

任普安州判才優政善雅重儒紳去之日民咸思之

王威

六安侯志子洪武間承襲後降安南衛指揮調普安衛築城建署有總理才

華昇

普安衛指揮使在位三十餘年威德普著軍民悅服尋陞雲南都司

王 銳

普安指揮征山
都掌蠻陣亡

魏 政

普安百戶征山
都掌蠻陣亡

柳 文

普安衛人有勇畧官守備嘉靖二十七年
銅苗弗靖撫按檄文領兵討賊賊卒至衆

皆驚潰文仗劍曰彼獨非命何乃畏之敢有先逃
者斬後賊大至手刃數賊無援兵竟亡於陣未幾
賊首龍許保就擒勒之賊曰石老虎大將軍不要
錢柳守備不怕死吾是以就擒耳撫按檄銅仁立
祀祠以

曾 異 撰

四川舉人先為永寧州牧崇禎間移轄
安南流寇圍城率民堅守城陷死難

杜 純

南充人安南衛教授學問淵博規模嚴整
當道延之書院以教諸士著有三試集

梁海

洪武二十一年領軍開創安南衛遷建衛治城郭公署皆其籌畫勸督有方士卒不

知其勞軍民賴之

姚餘

洪武間為安南衛鎮撫果毅有膂力時安南寇亂餘隨西平侯沐英進勦至盤江與

賊遇奮勇擊之賊併力攻餘因遇害西平侯以間命有司卹其家遣官致祭

宋鉞

安南衛指揮永樂間從征交趾陣亡賜祭

尋治本

安南衛指揮崇禎間統兵征毛口六隆等寨陣亡

不帖傑

安南所副千戶驍勇多謀常以計破賊及築安南所城於楊那山民資保障

遵義府

晉

母雅

巴郡臨江人時西南夷強悍不靖以雅為夜郎太守殊俗感而化之

唐

楊端

太原人乾符初南詔陷播州端應募復之諭以威德縻以恩信夷人懷服五代以來

世襲宣撫使宋開禧中贈太師

宋

楊璨

唐贈太師端十三代孫嘉泰初襲播州安撫使開禧初蜀帥吳曦叛璨輸金錢戰馬

以助國用卒贈左衛大將軍忠州防禦使追封成毅侯

楊价

璪子方生時將校有夢神號蜀將軍者來价生貌如之長以邊功授閤門舍人卒贈

英烈

侯

楊文

璪孫寶祐間授承德郎修學勤政累官播州安撫使卒贈光祿大夫樞密使

田景遷

乾德中為珍州刺史上言自給賜珍州郡名以來連遭大火乞改州名詔從之改為

西高州並鑄五溪都防禦使印以賜之

鄭昌孫

珍州人嘉祐間元兵犯蜀據珍州境昌孫集兵禦之事聞贈州總制

楊邦憲

玠子端平間蠻人掠境憲領兵拒之擒酋長累贈平章事

江彥清

德祐初為珍州守元兵至瀘州守梅應春以城降彥清盡力守禦珍州破巷戰死

元

楊漢英

邦憲子字熙載生五載而父卒母田氏攜至上京見世祖遂襲父職賜名賽音巴哈

成宗大德五年宋隆濟及蛇節等叛詔劉國傑等率兵偕漢英討之師出搖境賊騎猝至漢英奮擊先進大兵繼之賊奔潰相繼納款後賊衆復合戰於墨特川又大破之蛇節乞降斬之並擒斬隆濟西南夷悉平武宗至大四年播南廬崩蠻內侵詔漢英率兵討之卒於軍追贈播國公諡忠宣

楊嘉正

漢英子至正初授播州等處管軍萬戶侍衛親軍都指揮使上護軍討平陽留總之

叛進中

書左丞

李嗣宗

至元末播州千戶守禦勇敢善撫兵衆人咸德之

明

楊鏗

嘉正從子洪武四年納土以為宣慰使後屢隨大軍討平叛寇卒贈懷安將軍子昇

襲職蒞政勤敏請開學校民知習詩書崇禮義邊境綏寧

韓志聰

播人洪武間征普定有功授長官世襲

羅琛

播人元末明王珍僭號於蜀太祖創興琛間道入金陵負版籍以獻朝廷嘉其功仍

以琛為播州宣慰使同知

孫敏政

興國人舉人以同知協理善後事遵道義知府絕苞苴禁饋獻嚴搆訟鋤豪猾拯疾

苦恤災侵

高折枝

固始人進士以重慶推官監紀討播身先
行陣鼓勵士卒自播發難以迄蕩平厥功

最茂

何恩

遵義人祖大本掛大將軍印奉命征蠻終
於播襲宣慰司總管萬厯庚子恩憤楊應

龍肆虐棄職率七姓荷人宋世臣等赴闕上書請
討應龍命川黔兩省會勘黔議勦川議撫應龍因
以黃白千金行賄至慕江恩遮獲以充軍餉督帥
李化龍以為中軍提調又命其弟慇為劉綎向導
斬箐直入師逼海龍圍
播平恩兄弟與有功焉

王佐聖

明末知遵義縣會土賊郭士琦等倡首鼓
衆作亂奪印不與罵賊死遵人立祠於城

南祀
之

胡宗明

湖廣人舉人崇禎丙子任遵義縣歷五載平情折獄禮士興學人稱循卓

郭維屏

雲南人萬厯中舉人以從軍平播有功任正安州牧時改土設流一切制度皆其所

經始州人感德畏威歷久不替

鄭珣

真州長官司洪武初從征南將軍傅友德破偽夏擒其將江中立有功績入覲賜印

綬

何珩

湖廣人萬厯時平播設縣以選貢知桐梓縣築城建治創立祠廟招集流亡民得安

業

萬建侯

湖廣人萬厯中舉人知桐梓縣時設縣未久凡田賦差役供億經費及道路橋梁無

不悉心
規畫

洪維幹

江西人萬厯中舉人四十七年知桐梓縣天啓元年蘭賊奢崇明亂陷桐梓維幹坐

堂上罵賊不屈賊索印曰印在喉下索銀曰銀在喉下顏色甚厲賊不敢辱問三日詣虎峯崇德廟作來桐記題詩於壁乃自縊僕從死者數人其詩末云恨乏張巡相拒力願成厲鬼殺崇明賊平聞於朝賜墓祭廕其子千戶

唐文燦

廣西人崇禎間舉人知桐梓縣以轉移風俗為已任每月進諸生課文藝舉鄉飲勤

讀法善
政悉舉

詹淑

字士善麻城人萬厯間舉人平播後知綏陽縣建城設學撫字招徠編里甲定賦役

葭衙署成志葉大綱
卑舉邑人建祠祀之

母揚祖

天津人以選貢知綏陽清廉正直
善政宜民去任後邑人建祠以祀

袁 疊

仁懷縣人副總兵袁鏊弟也天啟二年奢
寅叛與賊相拒於仁懷之竹瓦寨血戰三

日夜兵敗被執罵賊而死事聞命於其戰地立忠
勇祠祀之廢其子蕙為叅將仍世襲指揮後又命
與陳王謨同祀
府城忠臣廟

陳王謨

郡人官副將崇禎十年流寇陷蜀謨督兵
禦賊血戰死之請於朝祔祀忠臣廟官其

弟王政
為千戶


國朝

劉

祺

綏陽人順治四年大兵抵遵祺率衆效順以叅將守遵義適涓龍殘寇倡獮祺以孤

軍禦賊於菖蒲塘血戰死之



貴州通志卷二十